

慧日佛學班第 13 期／福嚴推廣教育班第 24 期

《大智度論》卷 88

〈釋六喻品第七十七〉

(大正 25, 675a17-677c25)

釋厚觀 (2012.11.17)

【經】

壹、須菩提以四事問

須菩提白佛言：「世尊！⁽¹⁾云何無相、不可分別、自相空諸法中具足修六波羅蜜，所謂檀波羅蜜、尸羅波羅蜜、羼提波羅蜜、毘梨¹耶波羅蜜、禪波羅蜜、般若波羅蜜？世尊！⁽²⁾云何無異法中而分別說異相？⁽³⁾云何般若波羅蜜攝檀、尸、羼、精進、禪？⁽⁴⁾云何行異相法，以一相道得果？」²

貳、佛答³

(壹) 總說：住五陰如夢等行六度

佛告須菩提：「菩薩摩訶薩住五陰如夢、如響、如影、如焰、如幻、如化，⁴住是中，行布施、持戒、修 (675b) 忍辱、勤精進、入禪定、修智慧。⁵

(貳) 別釋

一、約施度說

(一) 知五陰如夢等，能具足無相施度

知是五陰實如夢、如響、如影、如焰、如幻、如化——五陰如夢無相，乃至如化無相。何以故？夢無自性，響、影、焰、幻、化皆無自性。若法無自性，是法無相；

¹ 梨=黎【明】。(大正 25, 675d, n.11)

² (1)《放光般若經》卷 17〈77 有相品〉：

爾時須菩提白佛言：「世尊！菩薩摩訶薩云何於無所破壞法、無相法、無所有法中，能具足六波羅蜜念？云何於是無形法而知差別入般若波羅蜜中？云何於無相法以一相而逮正覺？」(大正 8, 123c20-24)

(2)《大般若波羅蜜多經》卷 467〈75 無雜品〉：

爾時，具壽善現白佛言：「世尊！云何於一切無雜、無相、自相空法中，能圓滿六波羅蜜多？云何於一切無差別法中而施設差別？云何了知如是諸法差別之相？云何於般若波羅蜜多中能攝受一切六波羅蜜多，如是乃至攝受一切世、出世法？云何於一切異相法中施設一相，所謂無相，及於一相無相法中施設一切差別法相？」(大正 7, 364a19-26)

(3)《放光般若經》僅有三問，《摩訶般若波羅蜜經》有四問，而《大般若波羅蜜多經》(二分本)則有五問。

³《大品經義疏》卷 10：

佛答中為二：初、總答，次、得六度別答。雖總別二答，不別答四問，但總答也。問意云：「既空無相，應無四事？」佛答：「夢幻等四事，何共四事，如夢幻四事，何曾事耶？」即是答四問也。(《卍新續藏經》24, 330b4-7)

⁴如夢、如化等，參見《大智度論》卷 6〈1 序品〉(大正 25, 101c8-108a18)。

⁵《大般若波羅蜜多經》卷 467〈75 無雜品〉：

佛告善現：「諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，為諸有情布施、持戒、安忍、精進、修定、學慧。」(大正 7, 364a26-29)

若法無相，是法一相，所謂無相。

以是因緣故，須菩提！當知菩薩布施無相、施者無相⁶、受者無相。⁷

（二）攝諸功德

能如是知布施，是能具足檀波羅蜜乃至能具足般若波羅蜜，能具足四念處乃至八聖道分，能具足內空乃至無法有法空，能具足空三昧、無相⁸、無作三昧，能具足八背捨、九次第定、五神通、五百陀羅尼門，能具足佛十力、四無所畏、四無礙智、十八不共法。

是菩薩住是報得無漏法中，飛到東方無量國土，供養諸佛衣服、飲食，乃至隨其所須而供養之。⁹

（三）利益眾生

亦利益眾生——應以布施攝者，而布施攝之；應以持戒攝者，教令持戒；應以忍辱、精進、禪定、智慧攝者，教令忍辱、精進、禪定、智慧而攝取之；乃至應以種種善法攝者，以種種善法而攝取之。

是菩薩成就是一切善法，受世間身，不為世間生死所污；為眾生故，於天、人中受尊貴富樂，以是尊貴富樂攝取眾生。¹⁰

（四）不住二乘，當得佛果

是菩薩知一切法無相故，知須陀洹果亦不於中住，知斯陀含果、阿那含果、阿羅漢果亦不於中住，知辟支佛道亦不於中住。

何以故？是菩薩用一切種智知一切法已，應當得一切種智，不與聲聞、辟支佛共。

（五）結

如是，須菩提！菩薩摩訶薩知¹¹一切法無相已，知六波羅蜜無相，乃至知一切佛法無相。¹²

二、約戒度說

（一）住五陰如夢等，能具足無相戒度

⁶ 〔施者無相〕—【宋】【元】【明】【宮】。（大正 25，675d，n.12）

⁷ 《大般若波羅蜜多經》卷 467〈75 無雜品〉：「如實了知如夢乃至如化五蘊皆同一相，所謂無相。所以者何？夢乃至化皆無自性，若法無自性是法則無相，若法無相是法一相，所謂無相。由此因緣，當知一切施者、受者、施物、施性、施果、施緣皆同無相。」（大正 7，364a29-b5）

⁸ 相+（三昧）【石】。（大正 25，675d，n.13）

⁹ 《大般若波羅蜜多經》卷 467〈75 無雜品〉：「是菩薩摩訶薩安住如是諸異熟聖無漏法中，能往十方殑伽沙等諸佛世界，以無量種上妙供具，恭敬供養、尊重讚歎諸佛世尊。」（大正 7，364b17-20）

¹⁰ 《大般若波羅蜜多經》卷 467〈75 無雜品〉：「是菩薩摩訶薩成一切殊勝善根，於一切法皆得自在，雖受生死不為生死過失所染。為欲利樂諸有情故，攝受人天富貴自在，由此富貴自在威力，能作有情諸饒益事，以四攝事而攝受之。」（大正 7，364b24-28）

¹¹ 知+（知）【聖】。（大正 25，675d，n.14）

¹² 《大般若波羅蜜多經》卷 467〈75 無雜品〉：「如是，善現！諸菩薩摩訶薩知一切法皆無相故，如實了知布施等六波羅蜜多及餘無量無邊佛法皆同無相；由此因緣，普能圓滿一切佛法，便能證得一切智智。」（大正 7，364c4-7）

1、善持一切戒

復次，須菩提！菩薩摩訶薩住五陰如夢、如響、如影、如焰、如幻、如化，能具(675c)足無相尸羅波羅蜜。是戒不缺、不破、不雜、不著，聖人所讚無漏戒，入八聖道分；住是戒中，持一切戒，所謂名字戒、自然戒¹³、律儀戒、作戒、無作戒、威儀戒、非威儀戒。¹⁴

2、不作願生人中豪貴、諸天，不取二乘果

是菩薩成就諸戒，不作是願：『我以此戒因緣故，生刹利大姓、婆羅門大姓、居士大家，若小王家、若轉輪聖王家，若四天王天處生，若三十三天、夜摩天、兜率陀天、化樂天、他化自在天。』

不作是願：『我持戒因緣故，當得須陀洹果、斯陀含果、阿那含果、阿羅漢果、辟支佛道。』

何以故？一切法無相，所謂一相。無相法不能得無相法，有相法不能得有相法；無相法不能得有相法，有相法不能得無相法。¹⁵

(二)攝諸功德

如是，須菩提！菩薩摩訶薩行般若波羅蜜時，能具足無相尸羅波羅蜜而入菩薩位；入菩薩位已，得無生法忍；行道種智，得報得五神通；住五百陀羅尼門，得四無礙智。

(三)親近諸佛，兼濟眾生

從一佛國至一佛國，供養諸佛，成就眾生、淨佛國土。雖入五道中，生死業報不能染¹⁶污。

須菩提！譬如化轉輪聖王，雖坐臥行住，不見來處，不見去處，不見住處、坐處、臥處，而能利益眾生，亦不得眾生；菩薩亦如是。¹⁷

須菩提！譬如須扇多佛，得阿耨多羅三藐三菩提，為三乘轉法輪，無有得菩薩記者；

¹³ 《彌沙塞部和醯五分律》卷 15：

菩薩復前向須摩那樹，樹下有剃頭師，求令除髮，即為剃之。釋提桓因如屈伸臂頃至菩薩前，以衣承髮持還天宮。剃已作是念：「我今已為出家自然具戒。」(大正 22, 102b9-13)

¹⁴ 《大般若波羅蜜多經》卷 467〈75 無雜品〉：「復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，圓滿淨戒波羅蜜多。是菩薩摩訶薩如實了知如夢乃至如化五蘊，便能圓滿無相淨戒波羅蜜多。如是淨戒，無缺無隙，無瑕無穢，無所取著，應受供養，智者所讚，妙善受持，妙善究竟，是聖無漏，是出世間道支所攝。安住此戒，能善受持受施設戒、法爾得戒、律儀戒、有表戒、無表戒、現行戒、不現行戒、威儀戒、非威儀戒。」(大正 7, 364c8-17)

¹⁵ 《大般若波羅蜜多經》卷 467〈75 無雜品〉：「所以者何？如是諸法皆同一相，所謂無相，無住、無得。無相之法不得無相，有相之法不得有相，無相之法不得有相，有相之法不得無相，由是因緣都無所得。」(大正 7, 364c27-365a1)

¹⁶ [染] — 【聖】。(大正 25, 675d, n.15)

¹⁷ 《大般若波羅蜜多經》卷 467〈75 無雜品〉：「是菩薩摩訶薩為化有情，雖現流轉諸趣生死，而不為彼過失所染。如幻化人雖現行住坐臥等事，而無真實往來等業；雖現種種饒益有情，而於有情及彼施設都無所得。」(大正 7, 365a10-14)

化作化¹⁸佛已，捨身¹⁹壽命，入無餘涅槃。²⁰

（四）結：具足戒度，攝取一切善法

須菩提！菩薩亦如是，行般若波羅蜜時，能具足尸羅波羅蜜；具足尸羅波羅蜜已，攝取²¹一切善法。

三、約忍度說

（一）住五陰如夢等，能具足無相忍度

復次，須菩提！菩薩摩訶薩行般若波羅蜜時，住五陰如夢、如響、如影、如焰、如幻、如化，具足無相羸提波羅蜜。」

（二）住生忍、法忍，能具足忍度，得無生法忍

1、依二忍具足忍度

「世尊！云何菩薩摩訶薩具足無相羸（676a）提波羅蜜？」

「須菩提！菩薩摩訶薩住二忍中，能具足羸提波羅蜜。何等二忍？生忍、法忍。²²從初發意乃至坐道場，於其中間，若一切眾生來罵詈辱惡語，或以瓦石、刀杖²³加是菩薩，是菩薩欲具足羸提波羅蜜故，乃至不生一念惡。²⁴

是菩薩如是思惟：『罵我者誰？害²⁵我者誰？以惡言加我、以瓦石刀杖害我者誰？』何以故？是菩薩於一切法得無相忍故，云何作是念——『是人罵我、害我』？²⁶

¹⁸ [化] — 【宋】【元】【明】【宮】。(大正 25, 675d, n.16)

¹⁹ [身] — 【宋】【元】【明】【宮】【聖】。(大正 25, 675d, n.17)

²⁰ 《大般若波羅蜜多經》卷 467〈75 無雜品〉：「如有如來、應、正等覺名善寂靜，證得無上正等菩提，轉妙法輪度無量眾，令出生死證得涅槃，而無有情堪受決得無上正等菩提記者。時，彼如來化作化佛令久住世，自捨壽行入無餘依般涅槃界。彼佛化身住一劫已，授一菩薩無上正等菩提記已方入涅槃。彼佛化身雖作種種饒益有情事而無所得，謂不得色、受、想、行、識，乃至不得一切有漏、無漏等法及諸有情。是菩薩摩訶薩亦復如是，雖有所作而無所得。」(大正 7, 365a14-23)

²¹ [取] — 【宋】【元】【明】【宮】【聖】。(大正 25, 675d, n.18)

²² 《大般若波羅蜜多經》卷 467〈75 無雜品〉：「善現！是菩薩摩訶薩如實了知是五取蘊無實相故，修二種忍便能圓滿無相安忍波羅蜜多。云何為二？謂安受忍及觀察忍。」(大正 7, 365b5-7)

²³ 杖=仗【宋】。(大正 25, 676d, n.1)

²⁴ 《大般若波羅蜜多經》卷 467〈75 無雜品〉：

安受忍者，謂諸菩薩從初發心乃至安坐妙菩提座，於其中間，假使一切有情之類競來訶毀，以辱惡言罵詈凌辱，復以瓦石、刀杖加害。是時，菩薩為滿安忍波羅蜜多，乃至不生一念忿恨，亦復不起加報之心，但作是念：「彼諸有情深可哀愍，增上煩惱擾動其心不得自在，於我發起如是惡業，我今不應瞋恨於彼。」復作是念：「由我攝受怨家諸蘊，令彼有情於我發起如是惡業，但應自責不應瞋彼。」菩薩如是審觀察時，於彼有情深生慈愍，如是等類名安受忍。(大正 7, 365b7-18)

²⁵ 害=割【宋】【元】【明】【宮】。(大正 25, 676d, n.2)

²⁶ 《大般若波羅蜜多經》卷 467〈75 無雜品〉：

觀察忍者，謂諸菩薩作是思惟：「諸行如幻、虛妄不實、不得自在，亦如虛空無我，有情、命者、生者、養者、士夫、補特伽羅、意生、孺童、作者、受者、知者、見者皆不可得，唯是虛妄分別所起，一切皆是自心所變。誰訶毀我？誰罵詈我？誰凌辱我？誰以種種瓦石、刀杖加害於我？誰復受彼凌辱加害？皆是自心虛妄分別，我今不應橫起執著，如是諸法由自性空、勝義空故都無所有。」菩薩如是審觀察時，如實了知諸行空寂，於一切法不生異想，如是等

若菩薩摩訶薩如是行，能具足羸提波羅蜜。

2、具足忍度故，得無生法忍

(1) 標舉

以是羸提波羅蜜具足故，得無生法忍。」

(2) 釋無生法忍

A、須菩提問

須菩提白佛言：「世尊！云何為無生法忍？是忍何所斷、何所知？」

B、佛答

(A) 乃至不生少許不善法，名「無生法忍」

佛告須菩提：「得法忍，乃至不生少許不善法，是故名無生法²⁷忍。

(B) 一切煩惱斷盡名「斷」，知一切法不生名「知」

一切菩薩所斷煩惱盡，是名斷；用智慧知一切法不生，是名知。」²⁸

(3) 兼論二乘忍與菩薩忍之異

A、須菩提問

須菩提白佛言：「世尊！諸聲聞辟支佛無生法忍、菩薩無生法忍，有何等異？」²⁹

B、佛答：二乘若智、若斷，是名菩薩忍

佛告須菩提：「諸須陀洹若智、若斷，是名菩薩忍；斯陀含若智、若斷，是名菩薩忍；阿那含若智、若斷，是名菩薩忍；阿羅漢若智、若斷，是名菩薩忍；辟支佛若智、若斷，是名菩薩忍。是為異。」³⁰

(三) 攝諸功德

須菩提！菩薩摩訶薩成就是忍，勝一切聲聞、辟支佛。

住如³¹是報得無生忍中，行菩薩道，能具足道種智；具足道種智故，常不離三十七助道法及空³²、無相、無作三昧，常不離五神通；

(四) 嚴土熟生，得一切種智

不離五神通故，能成就眾生、淨佛國土；成就眾生、淨佛國土已，當得一切種智。

類名觀察忍。(大正 7, 365b18-28)

²⁷ [法] — 【宋】【元】【明】【宮】。(大正 25, 676d, n.3)

²⁸ 《大般若波羅蜜多經》卷 467 〈75 無雜品〉：

佛告善現：「由此勢力，乃至少分惡不善法亦不得生，是故名為無生法忍。此令一切我及我所慢等煩惱畢竟不生，如實忍受諸行如夢乃至如化。此忍名智，得此智故說名獲得無生法忍。」(大正 7, 365c3-7)

²⁹ 《大般若波羅蜜多經》卷 467 〈75 無雜品〉：

具壽善現復白佛言：「聲聞、獨覺及諸菩薩無生法忍有何差別？」(大正 7, 365c7-9)

³⁰ 《大般若波羅蜜多經》卷 467 〈75 無雜品〉：

佛告善現：「諸預流者若智、若斷乃至獨覺若智、若斷，亦名菩薩摩訶薩忍。復有菩薩摩訶薩忍，謂忍諸法畢竟不生。是為差別。」(大正 7, 365c9-12)

³¹ [如] — 【宋】【元】【明】【宮】。(大正 25, 676d, n.4)

³² 及空 = 乃至【石】。(大正 25, 676d, n.5)

（五）結

如是，須菩提！菩薩摩訶薩具足無相羸提波羅蜜。

四、約精進度說

（一）住無相五陰如夢等，行身精進、心精進

復次，須菩提！菩薩摩訶薩住無相五陰如夢、如響、如影、如焰、如幻、如化，行身精進、心（676b）精進。

（二）以身精進、心精進能具足精進度

1、身精進

以身精進故起神通；起神通故，到十方國土，供養諸佛、饒益眾生；以身精進力教³³化眾生，令住三乘。

如是，須菩提！菩薩摩訶薩行般若波羅蜜，能具足無相精進波羅蜜。³⁴

2、心精進

是菩薩以心精進、聖無漏精進，入八聖道分中，能具足毘梨耶波羅蜜。

（三）攝諸功德

是毘梨耶波羅蜜皆攝一切善法——所謂四念處、四正勤、四如意足、五根、五力、七覺分、八聖道分，四禪、四無量心、四無色定、八解³⁵脫、九次第定，佛十力、四無所畏、四無礙智、十八不共法。

（四）得一切種智，轉法輪度眾生

是³⁶菩薩行是法，應具足一切種智；具足一切種智已，斷一切煩惱習，具足滿三十二相，身放無等無量光明；放光明已，三轉十二行法輪；法輪轉故，三千大千世界³⁷六種震動，光明遍照三千大千世界；三千大千世界中眾生聞說法聲，皆以三乘法而得度脫。³⁸

（五）結：具足精進度，能大饒益，具足一切種智

如是，須菩提！菩薩摩訶薩住精進波羅蜜中，能大饒益及能具足一切種智。

³³ 教=故【宮】。（大正 25，676d，n.6）

³⁴ 《大般若波羅蜜多經》卷 468〈75 無雜品〉：「是菩薩摩訶薩發起勇猛身精進故，引發殊勝迅疾神通，能往十方殑伽沙等諸佛世界，親近如來、應、正等覺，以無量種上妙供具供養恭敬、尊重讚歎，於諸佛所種諸善根，利益安樂諸有情類，亦能嚴淨種種佛土。是菩薩摩訶薩由身精進成熟有情，隨其所宜以三乘法方便安立各令究竟。如是，善現！諸菩薩摩訶薩行深般若波羅蜜多，由身精進能速圓滿無相精進波羅蜜多。」（大正 7，366a10-19）

³⁵ 解脫=背捨【石】。（大正 25，676d，n.7）

³⁶ 是+（中）【宋】【元】【明】【宮】【聖】。（大正 25，676d，n.8）

³⁷ 世界=國土【石】。（大正 25，676d，n.9）

³⁸ 《大般若波羅蜜多經》卷 468〈75 無雜品〉：「是菩薩摩訶薩發起勇猛心精進故，引發諸聖無漏道支所攝聖道圓滿精進波羅蜜多，於中具攝諸善法，謂四念住乃至八聖道支，……若如來十力乃至十八不共法，若無忘失法、恆住捨性，若一切智、道相智、一切相智。是菩薩摩訶薩由心精進，諸相隨好皆得圓滿，放大光明照無邊界。由心精進極圓滿故，便能永斷一切煩惱習氣相續，證得無上正等菩提，轉妙法輪具三十二相，令三千界六種變動。其中有情蒙光照觸、觀斯變動、聞正法音，隨其所應，於三乘道得不退轉各得究竟。」（大正 7，366a19-b7）

五、約禪定度說**(一) 住五陰如夢等，能具足無相禪定度****1、標舉**

復次，須菩提！菩薩住無相五陰如夢、如響、如影、如焰、如幻、如化，能具足禪波羅蜜。」

2、釋義**(1) 須菩提問**

「世尊！云何菩薩住五陰如夢、如響、如影、如焰、如幻、如化，能具足禪波羅蜜？」

(2) 佛答**A、除佛三昧外，餘三昧皆可證入**

「須菩提！菩薩摩訶薩入初禪乃至入³⁹第四禪，入慈、悲、喜、捨無量心，入無邊虛空處乃至入非有想非無想處，入空三昧、無相⁴⁰、無作三昧，入如電光三昧，入如金剛三昧，入聖正三昧；除諸佛三昧，諸餘三昧——若共聲聞、辟支佛三昧，皆證皆入。

B、不受三昧味，不受三昧果**(A) 正明**

亦不受三昧味，亦不受三昧果。

(B) 釋因由**a、知三昧無相無所有故不受味**

何以故？是菩薩知是三昧無相、無所有性，當云何於無相法受無相法味、無所有法受無所有法味？

b、不見人法故不受果

若不受味，(676c) 則不隨禪定力生若色界、若無色界。

何以故？是菩薩不見是二界，亦不見是禪，亦不見入禪者，亦不見用法入禪者。⁴¹

C、結

若不得是法，即能具足無相禪波羅蜜。⁴²

(二) 攝諸功德**1、能過二乘地**

³⁹ 〔入〕—【宋】【元】【明】【宮】【聖】。(大正 25, 676d, n.10)

⁴⁰ 相+ (三昧)【石】。(大正 25, 676d, n.11)

⁴¹ (1) 《放光般若經》卷 17 〈77 無有相品〉：「何以故？不見其形故，亦不見三昧、亦不見三昧相，亦無所見故。」(大正 8, 124c26-27)

(2) 《大般若波羅蜜多經》卷 468 〈75 無雜品〉：「所以者何？是菩薩摩訶薩於一切界都無所得，於能入定及所入定、由此入定、為此入定亦無所得。」(大正 7, 366c1-3)

⁴² 《大般若波羅蜜多經》卷 468 〈75 無雜品〉：「是菩薩摩訶薩於一切法無所得故，速能圓滿無相靜慮波羅蜜多，由此靜慮波羅蜜多超諸聲聞及獨覺地。」(大正 7, 366c3-6)

(1) 標舉

菩薩用是禪波羅蜜⁴³，能過聲聞、辟支佛地。」

(2) 釋因：善學空法故

A、須菩提問

須菩提白佛言：「世尊！云何菩薩具足無相禪波羅蜜故能過聲聞、辟支佛地？」

B、佛答：行空能入菩薩位

佛告須菩提⁴⁴：「菩薩⁴⁵善學內空，善學外空，乃至善學無法有法空；於是諸空，無法可住處——若須陀洹果，若斯陀含果、阿那含果、阿羅漢果，乃至一切種智；是諸空亦空。菩薩摩訶薩行如是諸空，能入菩薩位中。」⁴⁶

(3) 別辨菩薩位、非位

A、正明

須菩提白佛言：「世尊！云何菩薩摩訶薩位？云何非位？」

「須菩提！一切有所得是非菩薩位，一切無所得是菩薩位。」⁴⁷

B、論「有所得、無所得」

「世尊！何等是有所得？何等是無所得？」

(A) 非菩薩位——於法有所得

「須菩提！色是有所得，受、想、行、識是有所得，眼、耳、鼻、舌、身、意，乃至一切種智有所得——是非菩薩位。⁴⁸

(B) 菩薩位——於法不可示、不可說

須菩提！菩薩位者，是諸法不可示、不可⁴⁹說。

何等法不可示、不可說？

若色乃至一切種智。何以故？須菩提！色性是不可示、不可說，乃至一切種智性是不可示、不可說。

⁴³ 蜜+（菩薩）【石】。（大正 25，676d，n.12）

⁴⁴ 提+（是）【石】。（大正 25，676d，n.13）

⁴⁵ 薩+（摩訶薩）【石】。（大正 25，676d，n.14）

⁴⁶ 《大般若波羅蜜多經》卷 468〈75 無雜品〉：

佛告善現：「是菩薩摩訶薩善學內空乃至無性自性空故，便能圓滿無相靜慮波羅蜜多，超諸聲聞及獨覺地。是菩薩摩訶薩住諸空中，於一切法都無所得，不見有法離諸空者。是菩薩摩訶薩安住此中，不得預流果乃至不得獨覺菩提，亦復不得諸菩薩行及佛無上正等菩提，如是諸空亦皆空故。是菩薩摩訶薩由住此空，超諸聲聞、獨覺等地，證入菩薩正性離生。」（大正 7，366c8-16）

⁴⁷ 《大般若波羅蜜多經》卷 468〈75 無雜品〉：

具壽善現復白佛言：「諸菩薩摩訶薩以何為生？以何為離生？」

佛告善現：「諸菩薩摩訶薩以一切有所得為生，以一切無所得為離生。」（大正 7，366c16-19）

⁴⁸ 《大般若波羅蜜多經》卷 468〈75 無雜品〉：

佛告善現：「諸菩薩摩訶薩以一切法為有所得，謂菩薩摩訶薩以色、受、想、行、識為有所得，……以諸佛無上正等菩提為有所得，以一切智智為有所得。善現！諸菩薩摩訶薩以如是等種種法門為有所得，即有所得說名為生。」（大正 7，366c21-367a19）

⁴⁹ （亦）+不【宮】。（大正 25，676d，n.15）

須菩提！如是名菩薩位。⁵⁰

2、不隨禪生

是菩薩入位中，一切禪定、三昧具足，尚不隨禪定、三昧力生，何況住婬、怒、癡，於中起罪業生！⁵¹

(三) 成就眾生、嚴淨佛土

菩薩但住如幻法中饒益眾生，亦不得眾生及如幻法⁵²。
若無所得，是時，能成就眾生、淨佛國土。⁵³

(四) 結：具足禪度，能轉不可得法輪

如是，須菩提！是名菩薩具足無相禪波羅蜜，乃至能轉法輪，所謂不可得法⁵⁴輪。⁵⁵

六、約般若度說

(一) 行般若度，知諸法如夢等

1、標舉

復次，須菩提！菩薩摩訶薩行般若波羅蜜，知一切法如夢、如響、如焰、如影、如幻、如化。」

2、釋義

(1) 須菩提問

須菩提白佛言：「世尊！菩(677a)薩摩訶薩云何知一切法如夢、如響、如影、如焰、如幻、如化？」

(2) 佛答

A、不見「夢等法及能見法者」

「須菩提！菩薩摩訶薩行般若波羅蜜時，不見夢、不見見夢者，不見響、不見聞響者，不見影、不見見影者，不見焰、不見見焰者，不見幻、不見見幻者，不見

⁵⁰ 《大般若波羅蜜多經》卷 468〈75 無雜品〉：「復次，善現！諸菩薩摩訶薩以一切法無行、無得、無說、無示為無所得。謂諸菩薩摩訶薩以色、受、想、行、識，無行、無得、無說、無示為無所得。所以者何？色自性乃至識自性皆不可行、得、說、示故。……諸菩薩摩訶薩以一切智智無行、無得、無說、無示為無所得。所以者何？一切智智自性皆不可行、得、說、示故。善現！諸菩薩摩訶薩以如是等種種法門無行、無得、無說、無示為無所得，即無所得說名離生。」(大正 7, 367a19-368a26)

⁵¹ 《大般若波羅蜜多經》卷 468〈75 無雜品〉：「諸菩薩摩訶薩證入正性離生位已，圓滿一切靜慮、解脫、等持、等至，尚不隨定勢力而生，況隨貪、瞋、癡等煩惱！若隨煩惱勢力而生，無有是處！是菩薩摩訶薩安住此中造作諸業，由業勢力流轉諸趣亦無是處！」(大正 7, 368a26-b1)

⁵² 及如幻法=亦不得【石】。(大正 25, 676d, n.16)

⁵³ 《大般若波羅蜜多經》卷 468〈75 無雜品〉：「是菩薩摩訶薩雖住如幻諸行聚中，作諸有情如實饒益，而不得幻及諸有情。是菩薩摩訶薩於如是事無所得時，成熟有情、嚴淨佛土常無懈廢。」(大正 7, 368b1-5)

⁵⁴ 法+（法）【石】。(大正 25, 676d, n.17)

⁵⁵ 《大般若波羅蜜多經》卷 468〈75 無雜品〉：「如是，善現！諸菩薩摩訶薩行深般若波羅蜜多時，速能圓滿無相靜慮波羅蜜多。由此靜慮波羅蜜多速圓滿故，疾證無上正等菩提，轉妙法輪度有情眾，如是法輪名無所得。」(大正 7, 368b5-9)

化、不見見化者。

何以故？是夢、響、影、焰、幻、化皆是凡夫愚人顛倒法故。阿羅漢不見夢、不見見夢者，乃至不見化、不見見化者；辟支佛、菩薩摩訶薩、諸佛亦不見夢⁵⁶、不見見夢者，乃至不見化、亦不見見化者。

何以故？一切法無所有性、不生、不定。⁵⁷

B、諸法無實性故能修般若

若法無所有性、不生、不定，菩薩摩訶薩當云何行般若波羅蜜，是中取生相、定相？是處不然！

何以故？若諸法⁵⁸少多有性、有生、有定，不名修⁵⁹般若波羅蜜。⁶⁰

C、善行般若度，不著一切法

如是，須菩提！菩薩摩訶薩行般若波羅蜜，不著色乃至不著識，不著欲、色、無色界，不著諸禪、解脫、三昧，不著四念處乃至八聖道分，不著空三昧、無相⁶¹、無作三昧，不著檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜。

(二) 攝諸功德，得無上菩提度眾生

1、具足菩薩十地而不生著

不著故，能具足菩薩初地，於初地中亦不生著。何以故？是菩薩不得是地，云何生貪著？

乃至十地亦如是。

2、行般若亦不得般若，諸法與般若無二無別

是菩薩行般若波羅蜜，亦不得般若波羅蜜；若行般若波羅蜜時不得般若波羅蜜，是時見⁶²一切法皆入般若波羅蜜中，亦不得是法。何以故？是諸法與般若波羅蜜無二無別。

何以故？諸法入如、法性、實際故無分別。」⁶³

⁵⁶ 夢+（亦）【石】。（大正 25，677d，n.1）

⁵⁷ 《大般若波羅蜜多經》卷 468〈75 無雜品〉：「所以者何？以一切法無性為性，非成非實，無相無為，非實有性，與涅槃等。」（大正 7，368b25-26）

⁵⁸ 法=生以【聖】。（大正 25，677d，n.2）

⁵⁹ 〔修〕—【宋】【宮】。（大正 25，677d，n.3）

⁶⁰ 《大般若波羅蜜多經》卷 468〈75 無雜品〉：「若一切法無性為性，廣說乃至與涅槃等，云何菩薩摩訶薩行深般若波羅蜜多時，於一切法起有性想、成想、實想、有相、有為、有實性想？若起此想，無有是處！所以者何？若一切法有少自性，有成有實，有相有為，有實性可得者，則所修行甚深般若波羅蜜多應非般若波羅蜜多。」（大正 7，368b26-c4）

⁶¹ 相+（三昧）【石】。（大正 25，677d，n.4）

⁶² （不）+見【元】【明】【石】。（大正 25，677d，n.5）

⁶³ 《大般若波羅蜜多經》卷 468〈75 無雜品〉：「是菩薩摩訶薩雖行深般若波羅蜜多，而不得深般若波羅蜜多，由不得深般若波羅蜜多故，亦不得一切法。是菩薩摩訶薩雖觀般若波羅蜜多攝一切法，而於諸法都無所得。所以者何？以一切法與此般若波羅蜜多皆無二、無二處。何以故？一切法性不可分別說為真如、說為法界、說為實際，諸法無雜、無差別故。」（大正 7，368c28-369a6）

3、空有無礙**(1) 於諸法實相中，一切無相無分別****A、須菩提問**

須菩提白佛言：「世尊！若諸法無相⁶⁴、無分別，云何說是善是不善、是有漏是無漏、是世間是出世間、是有為是無為？」

B、佛反問

「須菩提！於⁶⁵汝（677b）意云何？諸法實相中，有法可說是善、是⁶⁶不善，乃至是有為、是無為，是須陀洹果乃至是阿羅漢、是辟支佛、是菩薩、是阿耨多羅三藐三菩提不？」

「世尊！不可說也！」

C、佛正答

「須菩提！以是因緣故，當知一切法無相、無分別、無生、無定⁶⁷、不可示。⁶⁸

(2) 善學空無所得，能具足六度，得無上菩提度眾生

須菩提！我本行菩薩道時，亦無有法可得性——若色、若受想行識乃至若有為、若無為，須陀洹果乃至阿耨多羅三藐三菩提。⁶⁹

如是，須菩提！菩薩摩訶薩行般若波羅蜜，從初發意乃至阿耨多羅三藐三菩提，應善學諸法性。善學諸法性故⁷⁰，是名阿耨多羅三藐三菩提道。行是道，能具足六波羅蜜，成就眾生、淨佛國土；住是法中得阿耨多羅三藐三菩提，以三乘法度脫眾生，亦不著三乘。⁷¹

(三) 勸修：以無相法為方便，修學般若波羅蜜

如是，須菩提！菩薩摩訶薩以無相法應學般若波羅蜜。」⁷²

⁶⁴ 〔無相〕—【聖】【石】。（大正 25，677d，n.6）

⁶⁵ 〔於〕—【宋】【宮】。（大正 25，677d，n.7）

⁶⁶ 〔是〕—【宋】【宮】。（大正 25，677d，n.8）

⁶⁷ 定=空【聖】。（大正 25，677d，n.9）

⁶⁸ 《大般若波羅蜜多經》卷 468〈75 無雜品〉：

佛告善現：「由是因緣，當知一切法無雜、無差別、無相、無生、無滅、無礙、無說、無示。」（大正 7，369a16-17）

⁶⁹ 《大般若波羅蜜多經》卷 468〈75 無雜品〉：「善現當知！我本修學菩薩道時，於法自性都無所得，謂不得色、受、想、行、識，……不得預流果乃至獨覺菩提，不得一切菩薩摩訶薩行，不得諸佛無上正等菩提。」（大正 7，369 a17-b10）

⁷⁰ 〔故〕—【宮】【聖】。（大正 25，677d，n.10）

⁷¹ 《大般若波羅蜜多經》卷 468〈75 無雜品〉：「如是，善現！諸菩薩摩訶薩行深般若波羅蜜多時，從初發心乃至安坐妙菩提座，常應善學諸法自性；若能善學諸法自性，則能善淨大菩提道，亦能圓滿諸菩薩行，成熟有情、嚴淨佛土，速證無上正等菩提，轉妙法輪，以三乘法方便調伏諸有情眾，令於三有不復輪迴，證得涅槃究竟安樂。」（大正 7，369b10-17）

⁷² 《大般若波羅蜜多經》卷 468〈75 無雜品〉：「如是，善現！諸菩薩摩訶薩應以無相而為方便，修學般若波羅蜜多。」（大正 7，369b17-18）

【論】⁷³

壹、釋第一問：云何於無相法中，分別說六度

（壹）明「以空問，以空答」之意

一、質難：「須菩提以空問，佛云何還以空答」

問曰：須菩提問佛：「若諸法無相無分別，云何差別說六波羅蜜？」佛還答：「菩薩住是如夢五眾中，能具足六波羅蜜。」須菩提以空問，佛還以空答，此問答云何得別異？

二、釋疑：依凡聖辨

答曰：

（一）須菩提問

須菩提問：「若諸法空，今⁷⁴眼見菩薩行六波羅蜜作佛！」

（二）佛答

佛答：

1、標宗

（1）凡夫無實智故，取相著空

凡夫⁷⁵遠實智慧，取相，見菩薩行六波羅蜜作佛，著是空法故難。

（2）菩薩近實相故，空有無碍

菩薩雖住⁷⁶五眾，住五眾如幻、如夢空法中，亦以空心行布施，是故雖行諸法，具足六⁷⁷波羅蜜，不妨於空。

2、舉喻

譬如雲⁷⁸霧，遠視則見，近之則無所見。

3、合法

凡夫亦如是，遠實相故，見諸佛。

菩薩近實相故，見皆空，是故不妨；不妨故，能於檀波羅蜜一念中具足行諸善法。

（貳）釋「報得無漏法」

是人常修無漏清淨波羅蜜故，轉身還（677c）報得無漏波羅蜜。

「報得」名更不修行，自然而得；譬如報得眼根，自然能見色。

得是報得無漏波羅蜜已，能變一⁷⁹身作無量阿僧祇身，於十方佛所具足聞諸佛甚深法，度脫十方眾生，漸漸淨佛世界，隨願作佛。

⁷³ 〔【論】〕－【宋】【元】【明】【宮】【聖】。（大正 25，677d，n.11）

⁷⁴ 今＝令【宋】【元】【明】【宮】。（大正 25，677d，n.12）

⁷⁵ 夫＝人【宋】【元】【明】【宮】【聖】【石】。（大正 25，677d，n.13）

⁷⁶ 住＝在【明】，〔住〕－【石】。（大正 25，677d，n.14）

⁷⁷ 〔六〕－【宋】【元】【明】【宮】【聖】。（大正 25，677d，n.15）

⁷⁸ 〔雲〕－【聖】。（大正 25，677d，n.16）

夫＝人【宋】【元】【明】【宮】【聖】【石】。（大正 25，677d，n.16）

⁷⁹ 〔一〕－【宋】【宮】。（大正 25，677d，n.17）

貳、釋第二問、第三問**（壹）第二問「若諸法空無相，云何分別說異相」，第三問「云何知行一度能具足餘度」**

問曰：「若諸法空無相，云何分別？云何得知行檀波羅蜜等，各各具足餘波羅蜜？」

（貳）答

答曰：

一、標宗：行者不自分別，而佛菩薩說其行一度具足諸行

行者雖不自分別，而諸佛、菩薩說其行檀、行尸，具足諸行。

二、舉喻明理：聲聞人見諦無分別法中，餘聖人明其行相如聲聞人入見諦——無漏、無相、無分別法中，餘聖人亦數⁸⁰其所入法：

- (1) 知諸法實相，所謂無相相，是名「正見」；
- (2) 正見得力已，名為「正行」；
- (3)~(5) 是時不惱眾生，不作諸惡，是名「正語」、「正業」、「正命」——是時雖無所說、亦無所造，而名為「正語」、「正業」。所以者何？是名深妙正語、正業，所謂畢竟不惱眾生故。
- (6) 是中發心有所造作，是名「精進」；
- (7) 繫念緣中，是名「正念」；
- (8) 攝心一處，是名「正定」。

見身、受、心、法實相，是名「四念處」；乃至七覺意，亦如是。

於四念處中，亦如八直聖道中，諸聖人為數。

三、合法菩薩亦如是，行是無相檀波羅蜜，能具足尸波羅蜜等諸善法。如檀波羅蜜，尸⁸¹波羅蜜等攝諸善法亦如是。**參、釋第四問：「以一度具諸度」與「以無相攝諸度」有何差別**問曰：上品中「以一波羅蜜具諸波羅蜜」，⁸²此「無相攝一切法」，有何差別？

答曰：上以一念中能具諸波羅蜜，此以諸法雖空無相而能具諸波羅蜜為異。

⁸⁰ (1) 數：1.計算，查點。5.數說，一件一件地說。8.分辨，詳察。(《漢語大詞典》(五)，p.507)

(2) 《大智度論》卷3〈1 序品〉：

種種諸學人，及諸數法人，是人所行法，願為如實說！是中，云何學人(śaikṣa)？云何數法人(saṃkhyāta-dharma)？

爾時，舍利弗默然。如三問，三默。

佛示義端，告舍利弗：「有生不？」

舍利弗答：「世尊！有生」。

有生者，欲為滅有為生法故，名學人；以智慧得無生法故，名數法人。(大正 25, 82c14-19)

⁸¹ 尸+(羅)【宋】【元】【明】【宮】【石】。(大正 25, 677d, n.18)

⁸² 《摩訶般若波羅蜜經》卷 23〈76 一念品〉(大正 8, 386c27-389c28)，《大般若波羅蜜多經》卷 466〈74 無相品〉(大正 7, 359a27-360b14)。

〈釋四攝品第七十八〉⁸³

（大正 25，677c26-684b5）

【經】

壹、明菩薩希有法

（壹）生身菩薩於一國土中方便化他

一、須菩提問

須菩提白佛言：「世尊！若諸法如夢、如響、如影、如焰、如幻、如化，無有實事、無所有性、自相空者，云何分別是善法、是不善法，是世間法、（678a）是出世間法，是有漏法、是無漏法，是有為法、是無為法，是法能得須陀洹果，能得斯陀含果、阿那含果、阿羅漢果，能得辟支佛道，能得阿耨多羅三藐三菩提？」

二、佛答

（一）凡夫顛倒心故起三業

佛告須菩提：「凡夫愚人得夢、得見夢者，乃至得化、得見化者，起身口意善業、不善業、無記業，起福業、若起罪業、作不動業。」

（二）明菩薩住二空中為眾生說法

1、二空破執示實相

是菩薩摩訶薩行般若波羅蜜，住二空中——畢竟空、無始空，為眾生說法，作是言：

『諸眾生！是色空無所有，受、想、行、識空無所有；⁸⁴十二入、十八界空無所有。色是夢，受、想、行、識是夢；十二入、十八界是夢。

色是響、是影、是焰、是幻、是化，受、想、行、識亦如是。

十二入、十八界是夢、是響、是影、是焰、是幻、是化。

是中無陰、入、界，無夢亦無見夢者，無響亦無聞響者，無影亦無見影者，無焰亦無見焰者，無幻亦無見幻者，無化亦無見化者。

2、呵眾生顛倒取相

一切法無⁸⁵根本實性無所有，汝等於無陰中見有⁸⁶陰、無入見有入、無界見有界。是一切法皆從因緣和合生，以顛倒心起，屬業果報，汝等何以故於諸法空無根本中而取根本相？』⁸⁷

⁸³ 卷第八十九首【石】，（大智……八）十二字＝（釋四攝品第七十八之上）十字【明】，（大智度論釋第七十八品四攝品）十三字【宮】，（摩訶般若波羅蜜品第七十七四攝品八十九）十八字【石】。（大正 25，677d，n.21）

⁸⁴ 《大般若波羅蜜多經》卷 468 〈76 眾德相品〉：

諸菩薩摩訶薩行深般若波羅蜜多時，以二種空觀察諸法。何謂二空？一、畢竟空。二、無際空。是菩薩摩訶薩安住如是二種空中，為諸有情宣說正法。謂作是言：「汝等應知色是空，離我、我所；受、想、行、識是空，離我、我所。」（大正 7，369c8-13）

⁸⁵ [無]－【宋】【宮】。（大正 25，678d，n.1）

⁸⁶ [有]－【宋】【元】【明】【宮】。（大正 25，678d，n.2）

⁸⁷ （1）《放光般若經》卷 18 〈78 住二空品〉：「諸法皆無形，所有皆無所有。無有五陰，汝等見有五陰；無十二衰，汝等見有諸衰；無十八性，汝等見有諸性。以因緣顛倒故便有諸法隨行所受。云何汝等於無所有法而有形相？」（大正 8，125c20-24）

(三) 令離惡生善**1、以福捨罪**

是時，菩薩摩訶薩行般若波羅蜜，以方便力故，於慳法中拔出眾生，教行檀波羅蜜；持是布施功德，得大福報。

從大福報拔出，教令持戒；持戒功德，生天上尊貴處。

復拔出，令住初禪；初禪功德，生梵天處。

二禪、三禪、四禪、無邊空處、無邊⁸⁸識處、無所有處、非有想非無想處亦如是。

2、以空捨福

眾生行是布施及布施果報，持戒及持戒果報，禪定及禪定果報，種種因緣⁸⁹拔出，安置無餘涅槃及涅槃道中，所謂四念處、四正勤、四如意足、五根、五力、(678b)七覺分、八聖道分，空解脫門、無相、無作解脫門，八背捨、九次第定，佛十力、四無所畏、四無礙智、十八不共法，安隱眾生，令住聖無漏法——無色、無形、無對法中。

3、令證聖果

有可得須陀洹果者，安隱教化，令住須陀洹果；可得斯陀含果、阿那含果、阿羅漢果、辟支佛道者，令住斯陀含果、阿那含果、阿羅漢果、辟支佛道；可得阿耨多羅三藐三菩提者，亦安隱教化，令住阿耨多羅三藐三菩提中。」

三、稱歎述成**(一) 須菩提領解稱歎**

須菩提白佛言：「世尊！諸菩薩摩訶薩甚希有難及，能行是深般若波羅蜜，諸法無所有性，畢竟空、無始空，而分別諸法是善、是不善，是有漏、是無漏，乃至是有為、是無為。」⁹⁰

(二) 如來述成

佛告須菩提：「如是！如是！諸菩薩摩訶薩甚希有難及，能行是深般若波羅蜜，諸法無所有性，畢竟空、無始空，而分別諸法。

須菩提！汝等若知是菩薩摩訶薩希有難及法，則知一切聲聞、辟支佛不能報，何況

(2) 《大般若波羅蜜多經》卷 468 〈76 眾德相品〉：

復作是言：「汝等應知是一切法皆無實事，無性為性。汝等虛妄分別力故，於無蘊中起有蘊想，於無處中起有處想，於無界中起有界想，於無觸中起有觸想，於無受中起有受想。」

復作是言：「汝等應知蘊、處、界等一切法性，皆從緣生，顛倒所起諸業異熟之所攝受，汝等何因於是虛妄無實事法起實事想？」(大正 7, 371a5-12)

⁸⁸ [無邊] — 【宋】【元】【明】【宮】。(大正 25, 678d, n.5)

⁸⁹ 種種因緣 = 因緣種種 【宋】【元】【明】【宮】【聖】。(大正 25, 678d, n.6)

⁹⁰ 《大般若波羅蜜多經》卷 469 〈76 眾德相品〉：

爾時，具壽善現白佛言：「世尊！諸菩薩摩訶薩甚為希有，行深般若波羅蜜多，觀察二空，雖知諸法一切如夢、如響、如像、如光影、如陽焰、如幻、如化，皆非實有，無性為性，自相皆空，而能安立善、非善等諸法差別皆無雜亂。」(大正 7, 371b27-c2)

餘人！」⁹¹

（貳）法身菩薩於無量世界中度眾無邊

一、正明法身菩薩利益眾生

（一）總述菩薩以希有法攝取眾生

須菩提白佛言：「世尊！何等是菩薩摩訶薩希有難及法，諸聲聞、辟支佛所無有？」佛告須菩提：「一心諦聽！有菩薩摩訶薩行般若波羅蜜，住報得六波羅蜜中及住報得五神通、三十七助道法，住諸陀羅尼、諸無礙智，到十方世界，可以布施度者，以布施攝之；可以持戒度者，以持戒攝之；可以忍辱、精進、禪定、智慧度者，隨其所應而攝取之。

可以初禪度者，以初禪攝取之；可以二禪、三禪、四禪、無邊空處、無邊識處、無所有處、非有想非無想處度者，隨其所應而攝取之。

可以慈、悲、喜、捨心度者，以慈、悲、喜、捨心攝取之。

可以四念處、四正勤、四（678c）如意足、五根、五力、七覺分、八聖道分，空三昧、無相、無作三昧度者，隨所⁹²攝之。」

（二）別明以布施攝取眾生

1、明外施

（1）明平等施為得

「世尊！菩薩摩訶薩云何以布施饒益眾生？」

「須菩提！菩薩行般若波羅蜜時布施，隨其所須飲食、衣服、車馬、香華、瓔珞、種種所須，盡給與之。若供養佛、辟支佛、阿羅漢、阿那含、斯陀含、須陀洹等無有異；若施入正道中人及凡人，下至禽獸，皆無分別，等一布施。何以故？一切法不異、不分別故。

是菩薩無異、無⁹³別布施已，當得無分別法⁹⁴報，所謂一切種智。⁹⁵

（2）明差別施為失

須菩提！若菩薩摩訶薩見乞匄⁹⁶者，若生是心：『佛是福田，我應供養；禽獸非福

⁹¹ 《大般若波羅蜜多經》卷 469〈76 眾德相品〉：

汝等若知「諸菩薩摩訶薩行深般若波羅蜜多時所有甚奇希有之法，聲聞、獨覺皆不成就，不能測量」，汝等一切聲聞、獨覺於諸菩薩摩訶薩辯尚不能對，況餘有情而能酬答！（大正 7，371c6-10）

⁹² 所=而【宋】【元】【明】【宮】【石】。（大正 25，678d，n.13）

⁹³ 無+（分）【元】【明】【石】。（大正 25，678d，n.15）

⁹⁴ 〔法〕—【宋】【元】【明】【宮】。（大正 25，678d，n.16）

⁹⁵ 《大般若波羅蜜多經》卷 469〈76 眾德相品〉：「如是施時，其心平等無差別想而行布施——如施持戒，犯戒亦爾；如施人趣，非人亦爾；如施內道，外道亦爾；如施諸聖，異生亦爾；如施尊貴，下賤亦爾。上從諸佛下至傍生，平等平等無所分別，不觀福田勝劣有異。所以者何？諸菩薩摩訶薩了達一切自相皆空，空中都無上下差別故，無異想、無所分別而行布施。是菩薩摩訶薩由無異想、無所分別而行布施，當得無異、無分別法，謂得圓滿一切相智及餘無量諸佛功德。」（大正 7，372a14-23）

⁹⁶ （1）案：《大正藏》原作「匄」，今依《高麗藏》作「匄」（第 14 冊，1264c4）。

（2）匄：同「丐」。（《漢語大字典》（一），p.257）

田，不應供養。』是非菩薩法。何以故？菩薩摩訶薩發阿耨多羅三藐三菩提心，不作是念：『是眾生應以布施饒益，是不應布施。』

是眾生布施因緣故，應⁹⁷生剎利大姓、婆羅門大姓、居士大家，乃至以是布施因緣，以三乘法度之，令入無餘涅槃。⁹⁸

若眾生來從菩薩乞，亦不生異心分別：『應與是，不應與是。』

何以故？是菩薩為是眾生故發阿耨多羅三藐三菩提心；若分別簡擇，便墮諸佛、菩薩、辟支佛、學無學人、一切世間天及人訶責處：『誰請汝救一切眾生？汝為一切眾生舍、一切眾生護、一切眾生依，而分別簡擇應與、不應與？』

2、明內施

(1) 明平等施

復次，若菩薩摩訶薩行般若波羅蜜時，若人、若非人來，欲求乞菩薩身體支節⁹⁹，是時不應生二心：『若與？若不與？』何以故？是菩薩摩訶薩為眾生故受身，眾生來取，何可不與？

『我以饒益眾生故受是身，眾生不乞，自應與之，何況乞而不與！』

菩薩摩訶薩行般若波羅蜜，(679a) 應如是學。

(2) 正明內施

復次，須菩提！菩薩摩訶薩見有乞者，應生是念：『是中誰與、誰受？所施何物？是一切法自性皆不可得，以畢竟空故；空相法，無與、無奪。』¹⁰⁰

何以故？畢竟空故，內空故，外空、內外空、大空、第一義空、自相空故。

住是諸空布施，是時具足檀波羅蜜。具足檀波羅蜜故，若斷內外法時，作是念：『截我者誰？割我者誰？』

⁹⁷ [應] — 【宋】【元】【明】【宮】【聖】。(大正 25, 678d, n.18)

⁹⁸ (1) 《放光般若經》卷 18 〈78 住二空品〉：

菩薩發道意不作是念：「我持布施，當生四姓家。」諸所施已攝取眾生者，皆令至無餘泥洹而般泥洹。(大正 8, 126b2-4)

(2) 《大般若波羅蜜多經》卷 469 〈76 眾德相品〉：

諸菩薩摩訶薩要淨自心，福田方淨。見求乞者，不應念言：「如有情有所求乞，我應布施；如有情有所求乞，我不應施。」若作是念，違本所發大菩提心——謂諸菩薩發菩提心：「我為有情當作依怙、洲渚、舍宅、救護之處。」

見來乞者，應起是心：「今此有情貧窮孤露，我當以施而攝受之。彼由此緣，不盜他物，少欲喜足，能轉施他；由是因緣，離斷生命，廣說乃至離雜穢語，亦能調伏貪恚、邪見；身壞命終，乘前福業，生剎帝利大族、或婆羅門大族、或長者大族、或居士大族、或餘隨一富貴家生，豐饒財寶，修諸善業。或因布施攝受因緣，漸依三乘而趣圓寂——謂令趣證聲聞、獨覺及無上乘般涅槃界。」(大正 7, 372a28-b12)

⁹⁹ 支節：1.四肢。2.指四肢關節。(《漢語大詞典》(四)，p.1382)

¹⁰⁰ 《大般若波羅蜜多經》卷 469 〈76 眾德相品〉：

復次，善現！若菩薩摩訶薩見乞求者便起是心：「今^{*}於此中誰施？誰受？所施何物？由何而施？為何而施？云何而施？諸法自性皆不可得。所以者何？如是諸法皆畢竟空，非空法中有與有奪、有施有受。」(大正 7, 372c8-12)

※案：《大正藏》原作「令」，今依《高麗藏》作「今」(第 4 冊，152b9)。

二、佛舉自所見為證，明菩薩以三事教化眾生

（一）化三惡道

1、化地獄道；承事諸佛，聞法受持

復次，須菩提！我以佛眼見東方如恒河沙等諸菩薩摩訶薩入大地獄，令火滅湯¹⁰¹冷，以三事教化：一者、神通，二者、知他心，三者、說法。¹⁰²是菩薩以神通力，令大地獄火滅湯冷；知他心；以慈、悲、喜、捨，隨意說法。¹⁰³

是眾生於菩薩生清淨心，從地獄得脫，漸以三乘法得盡苦際。

南西北方、四維、上下亦如是。

復次，須菩提！我以佛眼觀十方世界，見如恒河沙等國土中諸菩薩為諸佛給使¹⁰⁴，供養¹⁰⁵諸佛，隨意愛樂恭敬；若諸佛所說，盡能受持，乃至阿耨多羅三藐三菩提，終不忘失。¹⁰⁶

2、化畜生道

復次，須菩提！我以佛眼觀十方如恒河沙等國土中諸菩薩摩訶薩，為畜生故，捨其壽命，割截身體，分散諸方。諸有眾生食是諸菩薩摩訶薩肉者¹⁰⁷，皆愛敬菩薩；以愛敬故，即得離畜生道，值遇諸佛，聞佛說法，如說修行，漸以三乘——聲聞、辟支佛、佛法於無餘涅槃而般涅槃。¹⁰⁸

如是，須菩提！諸菩薩摩訶薩所益甚多——教化眾生令發阿耨多羅三藐三菩提心，如說修行，乃至於無餘涅槃而般涅槃。

3、化餓鬼道

復次，須菩提！我以佛眼見十方如恒河沙等國土中諸菩薩摩訶薩除諸餓鬼飢渴苦，是諸餓鬼皆愛敬菩薩；以愛（679b）敬故，得離餓鬼道，值遇諸佛，聞諸佛說法，

¹⁰¹ 湯：1.沸水，熱水。（《漢語大詞典》（五），p.1459）

¹⁰² 三事教化，即神足、他心、教誡三神變。參見《雜阿含經》卷 8（197 經）（大正 2，50b14-c6）。

¹⁰³ 《大般若波羅蜜多經》卷 469〈76 眾德相品〉：「復次，善現！我以佛眼遍觀十方殑伽沙等諸世界中，有菩薩摩訶薩為欲利樂諸有情類，以故思願，入大地獄，見諸有情受諸劇苦；見已，發起三種示導。云何為三？一者、神變示導，二者、記說示導，三者、教誡示導。是菩薩摩訶薩以神變示導滅除地獄湯火刀等種種苦具，以記說示導記彼有情心之所念而為說法，以教誡示導於彼發起慈悲喜捨而為說法，令彼地獄諸有情類於菩薩所生淨信心；由此因緣，從地獄出，得生天上、或生人中，漸依三乘盡苦邊際，證涅槃界究竟安樂。」（大正 7，372c20-373a2）

¹⁰⁴ 給使：1.服事，供人役使。2.供役使之人。（《漢語大詞典》（九），p.825）

¹⁰⁵ 養=給【宋】【元】【明】【宮】【聖】。（大正 25，679d，n.3）

¹⁰⁶ 《大般若波羅蜜多經》卷 469〈76 眾德相品〉：「復次，善現！我以佛眼遍觀十方殑伽沙等諸世界中，有菩薩摩訶薩承事、供養諸佛世尊；是菩薩摩訶薩承事、供養佛世尊時，深心歡喜、愛樂、恭敬，非不歡喜、愛樂、恭敬；於諸如來應正等覺所說正法，恭敬聽聞、受持、讀、誦，乃至無上正等菩提，終不忘失。」（大正 7，373a2-7）

¹⁰⁷ 〔者〕—【宋】【元】【明】【宮】。（大正 25，679d，n.4）

¹⁰⁸ 《大般若波羅蜜多經》卷 469〈76 眾德相品〉：「復次，善現！我以佛眼遍觀十方殑伽沙等諸世界中，有菩薩摩訶薩為欲饒益傍生趣中諸有情故自捨身命。是菩薩摩訶薩見諸傍生飢火所逼欲相殘害，起慈愍心自割身分、斷諸支節，散擲十方，恣令食噉。諸傍生類得此菩薩身肉食者，皆於菩薩深起愛敬慚愧之心，由是因緣脫傍生趣，得生天上或生人中，值遇如來、應、正等覺，聞說正法，如實修行，漸依三乘而趣圓寂，謂隨證入無上大乘、獨覺、聲聞般涅槃界。」（大正 7，373a8-18）

如說修行，漸以三乘——聲聞、辟支佛、佛法而般涅槃，乃至無餘涅槃。
如是，須菩提！菩薩摩訶薩為度眾生故，行大悲心。

(二) 化天道

1、化欲界天

復次，須菩提！我以佛眼見諸菩薩摩訶薩在四天王天上說法，在三十三天、夜摩天、兜率陀天、化樂天、他化自在天上說法；諸天聞菩薩說法，漸以三乘而得滅度。
須菩提！是諸天眾中有貪著五欲者，是菩薩示現火起，燒其宮殿，而為說法，作是言：『諸天！一切有為法悉皆無常，誰得安者？』

2、化諸梵天

復次，須菩提！我以佛眼觀十方世界，見如恒河沙等國土中諸梵天著於邪見，諸菩薩摩訶薩教令遠離邪見，作是言：『汝等云何於空相虛妄諸法中而生邪見？』
如是，須菩提！菩薩摩訶薩住大悲心，為眾生說法。

(三) 結

須菩提！是為諸菩薩希有難及法。

三、詳論菩薩以四攝利益眾生

(一) 總標

復次，須菩提！我以佛眼觀十方世界如恒河沙等國土中，諸菩薩摩訶薩以四事攝取眾生。

何等為¹⁰⁹四？布施、愛語、利益、同事。

(二) 別釋

1、布施攝

(1) 總說

云何菩薩以布施攝取¹¹⁰眾生？

須菩提！菩薩以二種施攝取眾生：財施、法施。

(2) 別釋

A、財施

(A) 正明財施

何等財施攝取眾生？

須菩提！菩薩摩訶薩以金、銀、琉璃、頗梨¹¹¹、真珠、珂貝¹¹²、珊瑚等諸寶物，或以飲食、衣服、臥具、房舍、燈燭、華、香、瓔珞，若男、若女，若牛、羊、象、馬、車乘，若以己身，給施眾生；語眾生言：『汝等若有所須，各來取之；如取己物，莫得疑難！』

¹⁰⁹ [為] — 【宋】【元】【明】【宮】。(大正 25, 679d, n.7)

¹¹⁰ [取] — 【宋】【元】【明】【宮】【聖】。(大正 25, 679d, n.8)

¹¹¹ 頗(𠂔)梨：指狀如水晶的寶石。(《漢語大詞典》(十二)，p.287)

¹¹² (1) 珂貝=呵珮【石】。(大正 25, 679d, n.9)

(2) 珂(𠂔)：1.白色似玉的美石。一說為螺屬，貝類。(《漢語大詞典》(四)，p.531)

(B) 明財施已法施

是菩薩施已，教三歸依：歸依佛、歸依法、歸依僧；或教受五戒，或教一日戒；或教初禪乃至教非有想非無想定，或教慈、悲、喜、捨，或教念佛、念法、念僧、念戒、念捨、念天，或（679c）教不淨觀，或教安那般那觀，或相、或觸；或教四念處、四正勤、四如意足、五根、五力、七覺分、八聖道分，¹¹³空三昧，無相¹¹⁴、無作三昧，八背捨、九次第定，佛十力、四無所畏、四無礙智、十八不共法、大慈大悲、三十二相、八十隨形好；或教須陀洹果、斯陀含果、阿那含果、阿羅漢果，或教辟支佛道，或教阿耨多羅三藐三菩提。

(C) 結

如是，須菩提！菩薩摩訶薩行般若波羅蜜，以方便力教眾生，財施已，後¹¹⁵教令得無上安隱涅槃。

須菩提！是名菩薩摩訶薩希有難及法。

B、法施

(A) 總標

須菩提！菩薩云何以法施攝取眾生？

須菩提！法施有二種：一者、世間，二者、出世間。

(B) 別釋

a、明世間法施

(a) 略明世間法施

何等為世間法施？

敷演¹¹⁶、顯示世間法，所謂不淨觀、安那般那念、四禪、四無量心、四無色定。如是等世間法，及諸餘共凡夫所行法，是名世間法施。

(b) 廣述——因世間法施，得出世間法施

I、明所化事行

是菩薩如是世間法施已，以種種因緣教化，令遠離世間法；遠離世間法已，以方便力，令得聖無漏法及聖無漏法果。

II、明所化教乘

(I) 聖無漏法、聖無漏法果

何等是聖無漏法？何等是聖無漏法果？

聖無漏法者，三十七助道法、三解脫門。

聖無漏法果者，須陀洹果乃至阿羅漢果，辟支佛道，阿耨多羅三藐三菩提。¹¹⁷

¹¹³ 《大般若波羅蜜多經》卷 469〈76 眾德相品〉：「或勸修學不淨觀、持息念，或勸修學無常想乃至滅想，或勸修學四念住乃至八聖道支。」（大正 7，373c20-22）

¹¹⁴ 相+（三昧）【石】。（大正 25，679d，n.12）

¹¹⁵ 後=復【元】【明】。（大正 25，679d，n.14）

¹¹⁶ 敷演：1.陳述而加以發揮。（《漢語大詞典》（五），p.505）

¹¹⁷ （1）《放光般若經》卷 18〈78 住二空品〉：「何等為賢聖道法、賢聖果報？賢聖法者，謂三十七品及三脫門；賢聖果者，從須陀洹至羅漢、辟支佛。」（大正 8，127a21-23）

(II) 明菩薩乘之道果**i、正明**

復次，須菩提！菩薩摩訶薩聖無漏法：須陀洹果中智慧乃至阿羅漢果中智慧、辟支佛道中智慧、三十七助道法中智慧、六波羅蜜中智慧乃至大慈大悲中智慧——如是等一切法，若世間若出世間智慧、若有漏若無漏、若有為若無為，是法中一切種智，是名菩薩摩訶薩聖無漏¹¹⁸法。¹¹⁹

何等為聖無漏法果？斷一切煩惱習，是名聖無漏法果。」

ii、釋疑

須菩提白（680a）佛言：「世尊！菩薩摩訶薩得一切種智不？」

佛言：「如是！如是！須菩提！菩薩摩訶薩得一切種智。」¹²⁰

須菩提言¹²¹：「菩薩與佛有何等異？」

佛言：「有異。菩薩摩訶薩得一切種智，是名為佛。

所以者何？菩薩心與佛心無有異。

菩薩住是一切種智中，於一切法無不照明。¹²²

(c) 結明意趣

是名菩薩摩訶薩世間法施。

(2) 《大般若波羅蜜多經》卷 469〈76 眾德相品〉：「善現！云何聖法及聖法果？善現！言聖法者，謂三十七菩提分法及三解脫門等；聖法果者，謂預流果乃至獨覺菩提等。」（大正 7，374a22-25）

(3) 案：《摩訶般若波羅蜜經》中的「聖無漏法果」提到「聲聞四果、辟支佛道及阿耨多羅三藐三菩提」，但《放光般若經》及《大般若波羅蜜多經》（二分本）僅說「聲聞四果及辟支佛道」。

¹¹⁸ 〔無漏〕—【宋】。（大正 25，679d，n.18）

¹¹⁹ 《大般若波羅蜜多經》卷 469〈76 眾德相品〉：「復次，善現！諸菩薩摩訶薩聖法者，謂預流果智、一來果智、不還果智、阿羅漢果智、獨覺菩提智、諸佛無上正等菩提智，四念住乃至八聖道支智，空、無相、無願解脫門智，四靜慮、四無量、四無色定智，八解脫、八勝處、九次第定、十遍處智，布施波羅蜜多乃至般若波羅蜜多智，一切陀羅尼門、三摩地門智，苦、集、滅、道聖諦智，內空乃至無性自性空智，真如乃至不思議界智，極喜地乃至法雲地智，五眼、六神通智，淨觀地乃至如來地智，如來十力乃至十八不共法智，三十二大士相、八十隨好智，無忘失法、恒住捨性智，一切智、道相智、一切相智智，善法、非善法智，有記法、無記法智，有漏法、無漏法智，世間法、出世間法智，有為法、無為法智，是名聖法。」（大正 7，374b4-19）

¹²⁰ 《大般若波羅蜜多經》卷 469〈76 眾德相品〉：
具壽善現白言：「世尊！諸菩薩摩訶薩為亦能得一切相智？」

佛告善現：「如是！如是！諸菩薩摩訶薩亦名能得一切相智。」（大正 7，374b20-23）

¹²¹ 〔言菩……何〕三十一字—【聖】。（大正 25，680d，n.1）

¹²² 《大般若波羅蜜多經》卷 469〈76 眾德相品〉：

佛告善現：「諸菩薩摩訶薩名為隨得一切相智，諸佛世尊名為已得一切相智。所以者何？非諸菩薩與佛世尊條然有異，謂諸菩薩與佛世尊俱住諸法無差別性，於諸法相求正遍知說名菩薩，若至究竟名佛世尊。然佛世尊於一切法自相、共相照了無闇，清淨、具足。在因位時名為菩薩，若至果位名佛世尊。是謂菩薩與佛世尊雖俱名得一切相智，而有差別。」（大正 7，374b24-c4）

須菩提！菩薩摩訶薩因世間法施，得出世間法施。

如是，須菩提！菩薩摩訶薩教眾生令得世間法已，以方便力教令得出世間法。

b、明出世法施

(a) 標舉

須菩提！何等是菩薩出世間法不共凡夫法同？

所謂四念處、四正勤、四如意足、五根、五力、七覺分、八聖道分，三解脫門、八背捨、九次第定，佛十力、四無所畏、四無礙智、十八不共法、三十二相、八十隨形好，五百陀羅尼門——是名出世間法。

(b) 別釋

I、三十七道品¹²³

(I) 四念處¹²⁴

須菩提！云何為四念處？

菩薩摩訶薩觀內身循¹²⁵身觀、觀外身循身觀、觀內外身循身觀，勤精進，以一心智慧觀身、觀¹²⁶身集因緣、觀身滅、觀身集生滅；行是道，無所依，於世間無所¹²⁷愛。

受、心、法念處，亦如是。¹²⁸

(II) 四正勤¹²⁹

須菩提！云何為四正勤？

未生惡不善法，為不生故，勤、生欲、精進；

已生惡不善法，為斷故，勤、生欲、精進；

未生善法，為生故，勤、生欲、精進；

已生諸善法，為增長修具足故，勤、生欲、精進——是名四正勤。¹³⁰

(III) 四如意足¹³¹

須菩提！云何為四如意足？欲三昧斷行成就初如意足，精進三昧、心三昧、思惟三昧斷行成就如意足。¹³²

¹²³ 參見《大智度論》卷 19〈1 序品〉（大正 25，197b19-205c21）。

¹²⁴ 參見《大智度論》卷 19〈1 序品〉（大正 25，198c10-202b22）、卷 31〈1 序品〉（大正 25，285c23-287c6）、卷 48〈19 四念處品〉（大正 25，402c18-406a14）。

¹²⁵ 循=修【石】。（大正 25，680d，n.3）

¹²⁶ 〔觀〕—【宋】【元】【明】【聖】。（大正 25，680d，n.5）

¹²⁷ 所愛=所受【宋】【元】【明】，=愛【聖】。（大正 25，680d，n.6）

¹²⁸ 《大般若波羅蜜多經》卷 469〈76 眾德相品〉：「善現！四念住者，謂菩薩摩訶薩於內身、外身、內外身住循身觀，具足正勤，正知正念，除世貪憂，住身集觀，住身滅觀，由彼於身住循身觀，住身集觀，住身滅觀，無所依止，於諸世間無所執受，是為第一；於受、於心、於法亦爾。是名四念住。」（大正 7，374c23-28）

¹²⁹ 參見《大智度論》卷 19〈1 序品〉（大正 25，202b22-c6）。

¹³⁰ 《大般若波羅蜜多經》卷 469〈76 眾德相品〉：「善現！四正斷者，謂菩薩摩訶薩為令未生惡不善法永不生故，為令已生惡不善法永斷滅故，為令未生善法生故，為令已生善法堅住不忘，修滿倍增廣大智作證故，生起樂欲，發勤精進，策心持心，是名四正斷。」（大正 7，374c28-375a4）

¹³¹ 參見《大智度論》卷 2〈1 序品〉（大正 25，68a19-68b3）、卷 5〈1 序品〉（大正 25，97c22-98a7）。

¹³² 《大般若波羅蜜多經》卷 469〈76 眾德相品〉：「善現！四神足者，謂菩薩摩訶薩欲三摩地斷

(IV) 五根¹³³

云何為五根？信根、精進根、念根、定根、慧根。

(V) 五力

云何為五力？信力、精進力、念力、定力、慧力。

(VI) 七覺分¹³⁴

云何為七覺分？念覺分、擇法覺分、精進覺分、喜覺分、除息¹³⁵覺分、定覺（680b）分、捨覺分。

(VII) 八聖道分¹³⁶

云何為八聖道分？正見、正思惟、正語、正業、正命、正精進、正念、正定。

II、三三昧¹³⁷

云何為三三昧？空三昧門，無相¹³⁸、無作三昧門。

云何為空三昧？以空行、無我行攝心，是名空三昧。

云何為無相三昧？以寂滅行、離行攝心，是為無相三昧。

云何為無作三昧？無常行、苦行攝心，是為無作三昧。

III、八背捨¹³⁹

云何為八背捨？內¹⁴⁰色相外觀色，是初背捨¹⁴¹；內無色相外觀色，是二背捨；淨背捨，是三背捨；過一切色相，滅一切¹⁴²對相，不念一切異相故，觀無邊虛空，入無邊空處；乃至過一切非有想非無想處，入滅受想背捨。是名八背捨。

IV、九次第定¹⁴³

云何九次第定？行者離欲、惡不善法¹⁴⁴，有覺有觀，離生喜樂，入初禪；第二、第三、第四禪；乃至過非有想非無想處，入滅受想定。是名九次第定。

行成就修習神足，勤三摩地斷行成就修習神足，心三摩地斷行成就修習神足，觀三摩地斷行成就修習神足，依止厭，依止離，依止滅，迴向於捨，是名四神足。」（大正 7，375a4-9）

¹³³ 「五根、五力」，參見《大智度論》卷 19〈1 序品〉（大正 25，198b26-c2、202c20-29、204c29-205a2）、卷 73〈56 轉不轉品〉（大正 25，576c9-577a1）。

¹³⁴ 參見《大智度論》卷 19〈1 序品〉（大正 25，205a2-29）。

¹³⁵ 〔息〕—【聖】【石】。（大正 25，680d，n.7）

¹³⁶ 參見《大智度論》卷 19〈1 序品〉（大正 25，197b20-21、203a23-24）、卷 22〈1 序品〉（大正 25，226b13-19）、卷 62〈40 照明品〉（大正 25，499c17-25）、卷 87〈75 次第學品〉（大正 25，669a8-10）。

¹³⁷ 參見《大智度論》卷 20〈1 序品〉（大正 25，206a8-208a1）。

¹³⁸ 相+（三昧）【石】。（大正 25，680d，n.8）

¹³⁹ 參見《大智度論》卷 21〈1 序品〉（大正 25，215a7-216a27）。

¹⁴⁰ 內+（有）【元】【明】。（大正 25，680d，n.9）

¹⁴¹ 背捨=解脫【宋】【聖】。（大正 25，680d，n.10）

¹⁴² 一切=有【宋】【元】【明】【聖】。（大正 25，680d，n.11）

¹⁴³ 參見《大智度論》卷 21〈1 序品〉（大正 25，216c24-217a1）。

¹⁴⁴ 法+（相）【宋】。（大正 25，680d，n.12）

V、佛德

(I) 十力¹⁴⁵

云何為佛十力？⁽¹⁾是處、不是處，如實知；⁽²⁾知¹⁴⁶眾生過去、未來、現在諸業諸受法¹⁴⁷，知造業處，知因緣，知報；⁽³⁾諸禪定、解脫、三昧、定垢淨分別相，如實知；⁽⁴⁾知他眾生諸根上下相；⁽⁵⁾知他眾生種種欲解；⁽⁶⁾知一切¹⁴⁸世間種種無數性；⁽⁷⁾知一切到道相；⁽⁸⁾知種種宿命，一世乃至無量劫，如實知；⁽⁹⁾天眼見眾生，乃至生善惡道；⁽¹⁰⁾漏盡故，無漏心解脫，如實知。是為佛十力。

(II) 四無所畏¹⁴⁹

云何為佛¹⁵⁰四無所畏？

⁽¹⁾佛作誠言：『我是一切正智人。』若有沙門、婆羅門，若天、若魔、若梵、若復餘眾如實言：『是法不知。』乃至不見是微畏相。『以是故，我得安隱、得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾實不能轉。』一無畏也。

⁽²⁾佛作誠言：『我一切漏盡。』若有¹⁵¹沙(680c)門、婆羅門，若天、若魔、若梵、若復餘眾如實言：『是漏不盡。』乃至不見是微畏相。『以是故，我得安隱、得無所畏，安住聖主處，在大眾中作師子吼，能轉梵輪；諸沙門、婆羅門，若天、若魔、若梵、若復餘眾實不能轉。』二無畏也。

⁽³⁾佛作誠言：『我說障法。』若有沙門、婆羅門，若天、若魔、若梵、若復餘眾如實言：『受是法不障道。』乃至不見是微畏相。『以是故，我得安隱、得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾實不能轉。』三無畏也。

⁽⁴⁾佛作誠言：『我所說聖道，能出世間；隨是行，能盡苦。』若有沙門、婆羅門，若天、若魔、若梵、若復餘眾如實言：『行是道不能出世間、不能盡苦。』乃至不見是微畏相。『以是故，我得安隱、得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾實不能轉。』四無畏也。

(III) 四無礙智¹⁵²

¹⁴⁵ 參見《大智度論》卷 24〈1 序品〉(大正 25, 235c22-241b15)、卷 25〈1 序品〉(大正 25, 245c16-26)。

¹⁴⁶ [知] — 【宋】【元】【明】。(大正 25, 680d, n.14)

¹⁴⁷ [法] — 【聖】【石】。(大正 25, 680d, n.15)

¹⁴⁸ [一切] — 【宋】【元】【明】。(大正 25, 680d, n.16)

¹⁴⁹ 參見《大智度論》卷 25〈1 序品〉(大正 25, 241b24-245b9)、卷 48〈19 四念處品〉(大正 25, 407a26-b22)。

¹⁵⁰ [佛] — 【宋】【元】【明】。(大正 25, 680d, n.17)

¹⁵¹ [有] — 【宋】【元】【明】。(大正 25, 680d, n.18)

¹⁵² 參見《大智度論》卷 25〈1 序品〉(大正 25, 246a22-247b2)、卷 74〈57 燈炷品〉(大正 25, 581a14-22)。

云何為四無礙智？一者、義無礙智，二者、法無礙智，三者、辭無礙智，四者、樂說無礙智。

(1) 云何為¹⁵³義無礙智？緣義智慧，是為義無礙智。

(2) 云何為¹⁵⁴法無礙智？緣法智慧，是為法無礙智。

(3) 云何為辭無礙智？緣辭智慧，是為辭無礙智。

(4) 云何為樂說無礙智？緣樂說智慧，是為樂說無礙智。

(IV) 十八不共法¹⁵⁵

云何為十八不共法？

一者、諸佛身無失，二者¹⁵⁶、口無失，三、念無失，四、無異想¹⁵⁷，五、無不定心，六、無不知已¹⁵⁸捨心，七、欲無減¹⁵⁹，八、精進無減，九、念無減，十、慧無減，十一、解脫無減，十二、解脫知見無減，十三、一切身業隨智慧行，十四、一切口業隨智慧行，十五、一切意業隨智慧行，(681a) 十六、智慧知過去世無礙，十七、智慧知未來世無礙，十八、智慧知現在世無礙。

(V) 三十二相¹⁶⁰

云何三十二相？

一者、足下安平，立平如奩¹⁶¹底；¹⁶²二者、足下千輻輳輪，輪相具足；三者、手足指長勝於餘人；四者、手足柔軟勝餘身分；五者、足跟廣具足滿好；六者、手足指合縵網勝於餘人；七者、足趺¹⁶³高平好，與跟相稱；¹⁶⁴八者、伊泥延鹿躡，躡¹⁶⁵纖好，如伊泥延鹿王；九者、平住兩手摩膝；十者、

¹⁵³ [為] — 【宋】【元】【明】【聖】。(大正 25, 680d, n.19)

¹⁵⁴ [為] — 【宋】【元】【明】。(大正 25, 680d, n.20)

¹⁵⁵ 參見《大智度論》卷 26〈1 序品〉(大正 25, 247b11-256b4)。

¹⁵⁶ [者] — 【石】。(大正 25, 680d, n.21)

¹⁵⁷ 想=相【宋】【元】。(大正 25, 680d, n.22)

¹⁵⁸ [已] — 【宋】【元】【明】【聖】。(大正 25, 680d, n.23)

¹⁵⁹ 減=咸【聖】。(大正 25, 680d, n.24)

¹⁶⁰ 參見《大智度論》卷 4〈1 序品〉(大正 25, 90a22-91b21)、卷 21〈1 序品〉(大正 25, 219c8-220a12)、卷 29〈1 序品〉(大正 25, 273b20-275a5)。

¹⁶¹ (1) 奩(ㄉㄨㄛˋ)：1.古代盛梳妝用品的器具。《後漢書·皇后紀·光烈陰皇后》：“視太后鏡奩中物，感動悲涕。”李賢注：“奩，鏡匣也。”2.泛指盒匣一類的盛物器具。《漢語大詞典》(二)，p.1558)

(2) 案：「立平如奩底」，像鏡匣的底一樣平穩的意思。

¹⁶² 《大智度論》卷 4〈1 序品〉：「一者、足下安平立相：足下一切著地，間無所受，不容一針。」(大正 25, 90a27-29)

¹⁶³ 趺(ㄉㄨㄛˋ)：1.同“跗”。腳背。2.同“跗”。腳。《漢語大詞典》(十)，p.431)

¹⁶⁴ 《大般若波羅蜜多經》卷 469〈76 眾德相品〉：「如來足趺脩高充滿，柔軟妙好，與跟相稱，是為第七。」(大正 7, 376b26-27)

¹⁶⁵ (1) 躡躡=腩腩【元】【明】。(大正 25, 681d, n.2)

(2) 躡(ㄉㄨㄛˋ)：同「腩」。脛骨後肉。《漢語大字典》(六)，p.3733)

(3) 腩(ㄉㄨㄛˋ)：脛肉，小腿肚子。《說文·肉部》：“腩，腓腸也。”《漢語大字典》(三)，p.2096)

陰藏相，如馬王、象王；十一者、身縱廣等，如尼俱盧樹¹⁶⁶；十二者、一孔一毛生，色青、柔軟、右旋；十三者、毛上向，青色柔軟¹⁶⁷右旋；十四者、金色相，其色微妙勝閻浮檀金；十五者、身光面一丈；十六者、皮薄細滑不受塵垢，不停蚊蚋¹⁶⁸；十七者、七處滿：兩足下、兩手中、兩肩上、項中皆滿字相分明；十八者、兩腋下滿；十九者、上身如師子；二十者、身廣端直；二十一者、肩圓好；二十二者、四十齒；二十三者、齒白齊密而根深；二十四者、四牙最白而大；二十五者、方頰¹⁶⁹車如師子；二十六者、味中得上味，咽中二處津液流出；二十七者、舌大、軟、薄，能覆面至耳髮際；二十八者、梵音深遠，如迦蘭頻伽聲；二十九者、眼色如金精¹⁷⁰；¹⁷¹三十者、眼睫¹⁷²如牛王；三十一者、眉間白毫相，軟白如兜羅綿¹⁷³；三十二者、頂髻肉¹⁷⁴成。

是三十二相，佛身成就。

光明遍照三千大千世界¹⁷⁵，若欲廣照，則¹⁷⁶遍滿十方無量阿僧祇世界，為眾生故受丈光；若放無量光明，則無日月、時節、歲數。¹⁷⁷

佛音聲遍滿三千大千世界，若欲大聲，則遍滿十方無量阿僧祇世界；隨眾¹⁷⁸

¹⁶⁶ 尼俱盧樹 (nyagrodha)：banyan (印度) 榕樹。

¹⁶⁷ 軟+ (而)【宋】【元】【明】。(大正 25, 681d, n.3)

¹⁶⁸ (1) 蚋=虻【石】。(大正 25, 681d, n.5)

(2) 蚋 (口メㄨ、)：同「蚋」，蚊蟲。(《漢語大字典》(四)，p.2853)

¹⁶⁹ 頰 (ㄐ一ㄩˇ)：1.臉的兩側從眼到下頷部分。(《漢語大詞典》(十二)，p.311)

¹⁷⁰ (1) 參見《大智度論》卷 21〈1 序品〉：「諸青色，如金精山。」(大正 25, 215b25-26)

(2)《佛說觀佛三昧海經》卷 10〈12 觀佛密行品〉：

力士長跪白船師言：「我此明珠有六種色：即以黃繒裹珠置之水中水即金色；復還收珠以白繒裹置之水中水即變白；收取復以綠繒裹置之水中，水色變作綠琉璃色；收取以碧*繒裹置之水中，水即變作真金精色；收取復以絳繒裹置之水中，水即變作車璩色；收取復以紫繒裹置之水中，水即變成天金剛色。水上復有紫摩尼光。」(大正 15, 696a21-29)

※碧：2.青綠色。3.青白色。(《漢語大詞典》(七)，p.1066)

¹⁷¹ (1)《大智度論》卷 4〈1 序品〉：「二十九者，真青眼相：如好青蓮華。」(大正 25, 91a13-14)

(2)《大般若波羅蜜多經》卷 469〈76 眾德相品〉：「如來眼睛紺青鮮白，紅環間飾皎潔分明，是二十九。」(大正 7, 376c21-22)

¹⁷² 睫=眇【宋】，=睫【元】【明】。(大正 25, 681d, n.6)

¹⁷³ (1) 兜羅綿：1.棉。亦為草木花絮之總稱。(《漢語大詞典》(二)，p.280)

(2)《一切經音義》卷 11：「兜羅綿 (上都侯反。梵語，細粟綿也。即柳花絮草、花絮等是也)。」(大正 54, 371b11)

¹⁷⁴ 肉+ (骨)【宋】【元】【明】【石】。(大正 25, 681d, n.7)

¹⁷⁵ 世界=國土【石】。(大正 25, 681d, n.8)

¹⁷⁶ [則] - 【宋】【元】【明】【聖】。(大正 25, 681d, n.9)

¹⁷⁷ 《大般若波羅蜜多經》卷 470〈76 眾德相品〉：「善現！如來、應、正等覺成就如是諸相好故，身光任運能照三千大千世界無不遍滿，若作意時即能普照無量無邊無數世界，然為憐愍諸有情故，攝光常照面各一尋，若縱身光，即日月等所有光明皆悉不現，諸有情類便不能知晝夜、半月、月時、歲數，所作事業有不得成。」(大正 7, 378a4-10)

¹⁷⁸ 眾+ (生)【元】【明】。(大正 25, 681d, n.11)

多少，音聲遍至。¹⁷⁹ (681b)

【論】

壹、明菩薩希有法

(壹) 生身菩薩於一國土中方便化他

一、須菩提問

(一) 釋疑：須菩提何故重問「諸法性空，云何分別有善、不善」

問曰：上¹⁸⁰來已處處說：「諸法性空，云何分別有善、不善？」須菩提何以從後已來，品品¹⁸¹中義無異而作種種名問？

答曰：

1、如前已答

是事上已答。¹⁸²

2、眾生著心深難解故重問

復次，眾生從無始生死已來著心深難解故，須菩提復作是重問。

3、所說空義要故數問

復次，是般若波羅蜜欲說是空，義要故，數問。

4、愍未來眾生鈍根不解故重問

復次，佛在世時，眾生利根易悟；佛滅度五百年後，像法中眾生愛著佛法，墮著法中，言：「若諸法皆空、如夢、如幻，何以故有善、不善？」以是故，須菩提憐愍未來眾生鈍根不解故重問。

(二) 所問事

「世尊！若諸法皆空，云何分別有善、不善等？」

二、佛答

(一) 凡夫顛倒心故起三業

此中佛自說因緣：「凡夫顛倒心故，於法皆作顛倒異見，乃至不見一法是實。凡夫於夢中¹⁸³，著夢、得夢、見夢者，亦著夢中所見事。」

是人若不信罪福，起三種不善業；若信罪福，起三種善業。

善、不善、不動——

「善」名欲界中善法，喜樂果報。

「不善」名憂悲¹⁸⁴苦惱果報。

「不動」名生色、無色界因緣業。

¹⁷⁹ 《大般若波羅蜜多經》卷 470〈76 眾德相品〉：「佛聲任運能遍三千大千世界，若作意時即能遍滿無量無邊無數世界，然為利樂諸有情故，聲隨眾量不減不增。」(大正 7，378a10-12)

¹⁸⁰ 上來已 = 上已來【宋】【聖】【石】， = 從上已來【元】【明】。(大正 25，681d，n.12)

¹⁸¹ 〔品〕—【元】【明】。(大正 25，681d，n.13)

¹⁸² 《正觀》(6)，p.212：《大智度論》卷 86 (大正 25，665a23-b4)、卷 87 (大正 25，674b12-18)、卷 40 (大正 25，356a)。

¹⁸³ 中 = 法【宋】【元】【明】【聖】。(大正 25，681d，n.14)

¹⁸⁴ 悲 = 愁【宋】【元】【明】【聖】。(大正 25，681d，n.15)

〔二〕菩薩住二空中為眾生說法

1、二空破執示實相

菩薩知是三種業皆是虛誑不實，住二空中，為眾生說法——畢竟空破諸法，無始空破眾生相。

住中道，為眾生說法，所謂：「五眾、十二入、十八界皆是空，如夢、如幻乃至如化，是法中無夢、亦無見夢者。」

2、呵眾生顛倒取相

菩薩語眾生：「汝等於空法顛倒心故生諸著！」如《經》中廣說。

〔三〕令離惡生善

1、以福捨罪

〔1〕以施破慳貪

是菩薩方便力故，於顛倒中拔出眾生，著破顛倒法中。

譬如：慳貪是顛倒，以布施破慳貪¹⁸⁵法。

〔2〕以戒破著施

而眾生著是布施故，為說布施果報無常、實空；從布施拔出眾生，令持戒。

〔3〕以定破著戒

持戒及持戒果報中拔出眾生，語眾生言：「天福盡時，無常苦惱！」拔出眾生，令（681c）離欲、行禪定。

2、以空捨福，令證聖果

〔1〕正明：依諸道法，捨無常過，令住涅槃

而為說禪定及果報虛誑不實，能令人墮顛倒中。

種種因緣，為說布施、持戒、禪定無常過失，令住涅槃、得涅槃方便——所謂四念處乃至十八不共法，令眾生住是法中。

〔2〕簡別：三福業但少時益，亦復生苦，不應執

若布施、持戒、禪定是定實法，則不應令遠離。

如布施、持戒等破凡夫法，此則因顛倒而生，雖少時益眾生，久則變異，能生苦惱故，亦教令捨離。

〔3〕結成

菩薩方便力故，先教眾生捨罪，稱讚持戒、布施福德；次復¹⁸⁶為說持戒、布施亦未免無常苦惱，然後為說諸法空，但稱讚實法，所謂「無餘涅槃」。

三、稱歎述成

是時，須菩提歡喜：「甚希有！菩薩能如是知是諸法實相，所謂畢竟空，而為眾生說法，令至無餘涅槃。」

¹⁸⁵ 〔貪〕－【宋】【元】【明】。（大正 25，681d，n.16）

¹⁸⁶ 次復＝復次【宋】【元】【明】。（大正 25，681d，n.17）

佛言：「是一種希有。問¹⁸⁷欲更知菩薩希有法，一切聲聞、辟支佛不能報是菩薩，何況餘人！」

（貳）法身菩薩於無量世界中度眾無邊

一、正明法身菩薩利益眾生

（一）菩薩以希有法攝取眾生

須菩提問：「何等是更有希有法？」

佛答，如《經》中說。

（二）別釋

1、辨難：何故更說施、戒、定

問曰：經中教令布施、持戒、禪定，今復更說，有何等異？

答曰：先說生身菩薩，今說變化身。

先說一國土，今說無量世界。

如是等差別。

2、別明以布施攝取眾生

（1）平等外施——以何力故能令佛與畜生等

問曰：若菩薩知佛是福田、眾生非福田——是非菩薩法，菩薩以何力故能令佛與畜生等？

答曰：

A、般若力故修畢竟空心，於一切法無分別

菩薩以般若波羅蜜力故，一切法中修畢竟空心，是故於一切法無分別。

如畜生，五眾、十二入、十八界和合生，名為畜生；佛亦如是，從諸善法和合，假名為佛。

若人憐愍眾生，得無量福德；於佛著心，起諸惡因緣，得無量罪。

是故知一切法畢竟空故，不輕畜生，不著心貴佛。

B、知法無相，不取相分別

復次，諸法實相，是一切法無相，是無相中不分別是佛、是（682a）畜生；若分別即是取相，是故等觀。

C、入畢竟空門，則得平等觀無分別

復次，菩薩有二法門：一者、畢竟空法門，二者、分別好惡法門。

入空法門¹⁸⁸，則得等觀；入分別法門，諸阿羅漢、辟支佛尚不及佛，何況畜生！

為其輕眾生不憐愍布施故，教不分別。

（2）平等內施——身受割截而不生異心

問曰：菩薩身非木石，云何眾生來割截而不生異心？

答曰：

¹⁸⁷ 問=門【聖】。（大正 25，681d，n.18）

¹⁸⁸ 〔門〕—【宋】【元】【明】。（大正 25，682d，n.1）

A、久修忍度故

有人言：菩薩久修羸提波羅蜜故，能不愁惱；如羸提仙人被截手足，血皆為乳。¹⁸⁹

B、歷無量世深修大慈悲心故

有人言：菩薩無量世來深修大慈悲心故，雖有割截，亦不愁憂；譬如草木無有瞋心。

C、深修般若，得般若果報空心故

有人言：菩薩深修般若波羅蜜，轉身得般若波羅蜜果報空心故，了了知空，割截身時心亦不動；如外物不動，內亦如是。得般若果報故，於諸法中無所分別。

D、菩薩是法性生身，住無漏聖心而慈念眾生故

有人言：是菩薩非生死身，是出三界法性生身，住無漏聖心果報中故，身如木石，而能慈念割截者；是菩薩能生如是心故，割截劫奪內外法時，其心不動。

(三) 結成

是為菩薩希有法。

二、佛舉自所見為證，明菩薩以三事教化眾生

(一) 化三惡道

1、略說

復次，「希有法」者，如《經》中說：「我以佛眼見十方如恒河沙等世界中菩薩，入地獄中，令火滅湯冷，以三¹⁹⁰事教化眾生。」如《經》中說。

2、釋疑

(1) 若菩薩以三事化三惡道，云何仍有三惡道

問曰：若爾者，不應有三惡道！

答曰：

A、菩薩雖無量，三惡道眾生倍多無量

三惡道眾生無邊無量；菩薩雖無邊無量，眾生倍¹⁹¹多無量。

B、依可度因緣而得度，罪重者不見菩薩故不得度

菩薩隨眾生可度因緣，若於三惡道中有餘功德者，菩薩則度；重罪者則不見菩薩。

C、及者得脫，不及者不蒙

菩薩一相見¹⁹²無分別心故，不一一求覓眾生；譬如大赦¹⁹³，及¹⁹⁴者得脫，不及者

¹⁸⁹ (1) 參見 Lamotte (1944, p.264, n.1)：《大智度論》卷 14 (大正 25, 166c)；《六度集經》(44 經) (大正 3, 25a15-c7)；《僧伽羅刹所集經》(大正 4, 119a)；《大莊嚴論經》(63 經) (大正 4, 320a)，(65 經) (大正 4, 325c)；《賢愚經》(12 經) (大正 4, 359c-360b)，《金剛般若波羅蜜經》(大正 8, 750b)；《大般涅槃經》卷 31 (大正 12, 551a-b)；《大方等大集經》卷 50 (大正 13, 330b)；《阿育王傳》卷 5 (大正 50, 119b)；《大唐西域記》卷 3 (大正 51, 882b)；《經律異相》卷 8 (大正 53, 40b-c)。

(2) 本生：羸提比丘。(印順法師，《大智度論筆記》[H013] p.402)

¹⁹⁰ (是) + 三【石】。(大正 25, 682d, n.2)

¹⁹¹ 倍 = 位【聖】。(大正 25, 682d, n.3)

¹⁹² [見] - 【宋】【元】【明】。(大正 25, 682d, n.4)

則不蒙。

(2) 眾生割截、食用菩薩肉應有罪，云何得度

問曰：若眾生割截菩薩、或食其肉，應當有罪，云何得度？

答曰：

A、菩薩本願故

此菩薩本願：「若(682b)有眾生噉我肉者，當令得度。」

B、非以噉肉故得度，以起慈心故，得免畜生，值佛得度

如經中說：「眾生食菩薩肉者，則生慈心。」

譬如有色、聲、香、觸，人聞見則喜，復有聞見則瞋；味亦如是，有瞋者、有起慈心者。如《毘摩羅結經》說¹⁹⁵：「服食香飯，七日得道者，有不得者。」¹⁹⁶

非以噉肉故得度，以起發慈¹⁹⁷心故，得免畜生，生善處，值佛得度。

C、以內外俱施，意乃滿足

有菩薩於無量阿僧祇劫深行慈心，外物給施眾生，意猶不滿，并自以身布施，爾乃足滿。

如《法華經》中，藥王菩薩外物珍寶供養佛，意猶不滿；以身為燈供養於佛，爾乃足滿。¹⁹⁸

D、為令眾生驚感故以身布施

復次，人得外物，雖多，不以為恩。所以者何？非所愛重故。得其身時，乃能驚感，是故以身布施。

(二) 化天道

菩薩又為天上諸天說法，如《經》中廣說。

三、詳論菩薩以四攝利益眾生

(一) 總標

人以四事攝之：布施、愛語、利益、同事。

(二) 詳辨「布施攝」

1、略述財法二施

布施有二事，如《經》中廣說。

2、釋疑

(1) 何以略說三惡道及天道，而廣說人道法

問曰：何以略說餘四道，而廣說人道中法？

¹⁹³ 大赦：對全國已判罪犯普遍赦免或減刑。(《漢語大詞典》(二) p.1368)

¹⁹⁴ 及：1.追上，趕上。2.至，到達。10.來得及。(《漢語大詞典》(一) p.635)

¹⁹⁵ [說]—【宋】【元】【明】。(大正 25, 682d, n.5)

¹⁹⁶ 參見《維摩詰所說經》卷下〈11 菩薩行品〉(大正 14, 553b29-553c13)。

¹⁹⁷ [慈]—【聖】。(大正 25, 682d, n.6)

¹⁹⁸ (1) 參見《妙法蓮華經》卷 6〈23 藥王菩薩本事品〉(大正 9, 53a5-54a12)。

(2) 《法華經》：藥王燒身。(印順法師，《大智度論筆記》[H015] p.406)

答曰：

A、人以肉眼不見罪福因緣果報，又多著外道邪師故

三惡道中苦多故，眾生少疑，若見菩薩大神通希有事，則直信愛著得度。諸天有天眼故，自見罪福因緣¹⁹⁹；菩薩少現神足則解。人以肉眼不見罪福因緣果報，又多著外道邪師及邪見經書。

B、人中多有三毒、邪見故

諸煩惱有二分：一者、屬見，二者、屬愛。若但有一事，則不能成大罪。三毒人得邪見力，能盡作重惡；邪見人得貪欲、瞋恚，能大作罪事。如須陀洹雖有三毒，無邪見故，不作墮三惡道重罪。是故人中多有三毒、邪見。

C、人難度故多說

又眼不見罪福因緣故難度，難度故多說。

(2) 云何四攝事中廣說布施而略說餘三

問曰：若爾者，於四事中何以多說布施，餘三略說？

答曰：布施中攝三事故，以財施、法施（682c）教化眾生，則無所不攝。復次，四事中初廣開布施，則知餘三亦如是。

(3) 何以略說財施而廣說法施

問曰：若爾者，何以略說財施而廣說法施？

答曰：

A、財施少，法施廣故

財施少，法施廣故。所以者何？

財施，有量果報；法施，無量果報。

財施，欲界繫果報；法施，亦三界繫果報，亦是出三界果報。

財施，能與三界富樂；法施，能與涅槃常樂。

B、財施從法施生故

又財施從法施生，聞法則能施故。

C、財施唯富樂果報；法施果報種種，乃至佛道涅槃

復次，財施果報，但富樂，無種種；法施亦有富樂，亦有餘事，乃至佛道涅槃果報。

D、結

以是等因緣故，廣說法施。

二施義，如《經》中佛自廣說。

(4) 須菩提何故問「菩薩得一切種智不」

A、須菩提問

問曰：經中，須菩提何以故言「菩薩得一切種智不」？

¹⁹⁹ 緣+（果報）【宋】【元】【明】。（大正 25，682d，n.8）

答曰：須菩提意：若菩薩時得一切種智，則不名菩薩，云何未得佛而能得一切種智？

得一切種智故名為佛；若先作佛，何用一切種智為？

B、佛答

佛答：今得一切種智，名為菩薩；已得一切種智，名為佛。

菩薩時具足佛因緣，生心欲得一切種智；得已，名為佛。

真實之言：菩薩不得，佛亦不得。所以者何？菩薩未得；佛得已竟，更不復得。

世俗法故，說「菩薩今得，佛得已竟」；第一義中，則無一切法，何況佛及菩薩！

又《經》中言：「佛心不異菩薩，菩薩不異佛心。」次第相續不斷故，有²⁰⁰二心如無異、無分別故。

(5) 明出世法施

A、九次第定、相好皆世間共有，何故名為「出世間不共法」

問曰：九次第定、三十二相、八十隨形好，此是世間共有法，何以故名為「出世間不共法？」

答曰：

(A) 明九次第定

四禪、四無色定、滅受想，名「九次第」。

滅受定，但聖人能得。

四禪、四無色定——從初禪起更不雜餘心而入二禪；從二禪乃至滅受定，念念中受，不雜餘心，名為「次第」。

(B) 明三十二相

凡夫是罪人（683a）鈍根，云何能得三十二相？

如轉輪聖王、提婆達、難陀所得相，名字雖同，而威德、具足、淨潔、得處則不同於佛。如先分別轉輪聖王、佛相不同中說。²⁰¹

又是相，聖無漏法果報，故²⁰²自在隨意，無量無邊；

轉輪聖王等相，是福德業因緣，不能自在，有量有限。

復次，提婆達、難陀有三十相，無三十二相；轉輪聖王，雖有三十二相，無威德、不具足、不得處，與愛等煩惱俱。

(C) 明八十隨形好

八十隨形好具足，唯佛菩薩有之；餘人正可有少許，或指纖長，或失腹，有如是等無威德之好，不足言。

(D) 結

是故說言「出世間不共凡夫法」，無咎。

²⁰⁰ 有=又【宋】【元】【明】。（大正 25，682d，n.12）

²⁰¹ 《正觀》（6），p.212：《大智度論》卷 4（大正 25，91a20-b5）。又參見《大智度論》卷 2（大正 25，70b19-29）、卷 25（大正 25，244c-245a）。

²⁰² 故=果【宋】【元】【明】。（大正 25，683d，n.1）

B、云何經將竟而多說相好

問曰：從初來處處說諸法五眾乃至一切種智，不說是三十二相、八十隨形好；今經欲竟，何以品品中說？

答曰：佛有二種身：法身、生身。於二身中，法身為²⁰³大；法身大²⁰⁴，所益多故，上來廣說。今經欲訖故，生身義應當說，是故今說。

復次，是生身相好莊嚴是**聖無漏法果報**，今次第說；上雜諸波羅蜜說。

C、四念處等三乘共法如先說

四念處等諸法義，如先說。²⁰⁵

D、更釋十力等佛德

(A) 總標

十力等是佛法甚深義，今當更略說。

(B) 別辨

a、十力——何以但說十力

問曰：「佛十力」者，若總相說則一力，所謂「一切種智力」；若別相說則²⁰⁶千萬億種力，隨法為名，今何以但說十力？

答曰：

(a) 佛具無量智力，但眾生不能得不能行故不說

佛實有無量智力，但以眾生不能得、不能行故不說。

(b) 以此十力足以成辦度眾生事

是十力，可度眾生事辦。所以者何？

I、依「處非處智力」明

佛用是**處非**²⁰⁷**處力**，定知一切法中因果，所謂行惡業，墮惡道，有是處；行惡業，生天上，無是處。善亦如是。

不離五蓋、(683b)不修七覺得道者，無有是處；離五蓋、修七覺得道者²⁰⁸，有是處。

餘九力²⁰⁹盡入此力中。

佛以此力籌量十方六道中眾生可度者、不可度者——可度者，以種種因緣、神通變化而度脫之；不可度者，於此人中修捨心。

譬如良醫，觀其病相，審定知其可活則治之，不可活者則捨之。

²⁰³ [為] — 【聖】。(大正 25, 683d, n.3)

²⁰⁴ (1) [法身大] — 【聖】。(大正 25, 683d, n.4)

(2) [大] — 【石】。(大正 25, 683d, n.5)

²⁰⁵ 「四念處」等三十七道品，參見《大智度論》卷 19 〈1 序品〉(大正 25, 198c10-202b22)。

²⁰⁶ [則] — 【宋】【元】【明】。(大正 25, 683d, n.6)

²⁰⁷ [非處] — 【聖】。(大正 25, 683d, n.7)

²⁰⁸ [者] — 【宋】【元】【明】。(大正 25, 683d, n.8)

²⁰⁹ [力] — 【宋】【元】【明】。(大正 25, 683d, n.9)

II、依「知業報智力」明，III、依「禪定解脫三昧智力」明

「度眾生方便」者，所謂二力：業力、定力。

求其業因緣、生處。

人以業因緣故受身、縛著世間，禪定因緣故得解脫。

行者必應求苦從何而²¹⁰生、由何而滅。

是故用二力。

業力有二分：一者、淨業，能斷惡業；二者、垢業。

「淨業」名禪定、解脫、諸三昧；「不淨業」者，能於三界中受身。

IV、依「知眾生上下根智力」明

人有二種：鈍根，為受身故作業；利根，為滅身故作業。

問曰：若爾者，何以不皆令作淨業？

答曰：以眾生根有利鈍故。

V、依「知眾生種種欲智力」明，VI、依「知眾生種種性智力」明**(I) 出體****i、依「知眾生種種欲智力」明**

問曰：眾生何因緣故有利鈍？

答曰：以有種種欲力故。

惡欲眾生常入惡故鈍。「欲」名嗜好，嗜好罪事、生惡業故鈍。

善欲者樂道、修助道法故利。

ii、依「知眾生種種性智力」明

問曰：眾生何以不皆作²¹¹善欲²¹²？

答曰：是故佛說世間種種性，惡性、善性——惡性者惡欲，惡欲故根鈍。

如火熱性、水濕性，不應責其所以。

(II) 辨異

問曰：惡欲即是惡性，有何差別而作二力？

答曰：

i、性：先、內、重、難除、深、當受報，欲：後、外、輕、易捨、淺、不必受報

⁽¹⁾ 性，先有；欲，得因緣而生。譬如先有瘡²¹³，得觸因緣則血出。

⁽²⁾ 性，在內；欲，在外。

⁽³⁾ 性，重；欲，輕。

⁽⁴⁾ 性，難除；欲，易捨。

⁽⁵⁾ 性，深；欲，淺。

⁽⁶⁾ 用性作業，必當受報；用欲作業，不必受報。

²¹⁰ 〔而〕—【宋】【元】【明】。(大正 25, 683d, n.10)

²¹¹ 作=行【石】。(大正 25, 683d, n.11)

²¹² 欲=故【宋】【元】【明】。(大正 25, 683d, n.12)

²¹³ 瘡=創【聖】【石】。(大正 25, 683d, n.14)

有如是等差別。

ii、欲習長成性，性亦能生欲

復有人言：欲常習增長，遂成為性；性亦能生欲。

是人若今世、若後世常習是欲，則成為性；住是性中，作（683c）惡、作善；若住善性則可度，若住惡性則不可度。

VII、依「一切到處道智力」明

（I）出體

佛既知眾生二種性已，知其果報善道、惡道種種差別——惡性者墮三惡道，善性者有四種道：人、天、阿修羅、涅槃道。

（II）辨異：「一切到處道力」與「天眼」之別

問曰：「一切到處道力」與「天眼力」有何差別？

答曰：天眼但見生死時；此中未死時知，見因知果。天眼，見現前罪福果報。

（III）結成

是名「一切到處道力。」

VIII、IX、X、依「宿命智力，生死智力，漏盡智力」明

問曰：聲聞、辟支佛亦得涅槃、亦能化眾生，何以無是力？

答曰：是故說後三力。三世中眾生事盡能通達遍知——

以**宿命力**，一切眾生過去事本末悉知。

以**天眼生死智力**故，一切眾生未來世中無量事盡能遍知。

作是知己，知現世中眾生可度者為說**漏盡法**。

以是故，但佛有此力，二乘所無。

如有一人即日應得阿羅漢，舍利弗日中時語言：「汝無得道因緣。」捨而不度。晡時，佛以宿命神通見過去八萬劫前得道因緣，今應成就，晡時說法，即得阿羅漢道。²¹⁴

（c）十力籌量眾生得度因緣而說法

復次，佛以初力知眾生可度、不可度相；

以第二力知眾生為三障所覆、無覆者；

以第三力知眾生禪定、解脫淨不淨者；

以第四力知眾生根有利、有鈍，能通法性、不通者；

以第五力知眾生利²¹⁵鈍根因緣——善、惡欲；

以第六力知二欲因緣——種種性；

以第七力知眾生利鈍根善惡果報處七種道²¹⁶；

²¹⁴ 尚可得道，舍利弗不知而不度。（印順法師，《大智度論筆記》〔H027〕p.421）

²¹⁵ 利鈍根＝根利鈍【宋】【元】【明】。（大正 25，683d，n.18）

²¹⁶ 七種道，即上所言「三惡道并人、天、阿修羅、涅槃道」。

以第八力知眾生宿世善惡業障、不障；

以第九力知眾生今世未可度、未來世生處可度；

以第十力知是人以空解脫門入涅槃，無相、無作門入涅槃；知是人於見諦道、思惟道中念念中斷若干結使。

以是十（684a）力籌量眾生所應度緣而為說法。是故說法，初無空言。

b、三十二相：佛身相應無量，云何唯有三十二相

問曰：佛智慧無量，身相亦應無量！又佛身勝諸天王，何以正與轉輪聖王同有三十二相？

答曰：

(a) 三十二相適中，如先說

三十二相不多不少，義如先說。²¹⁷

(b) 相不定，隨眾生所好而現

I、總說

復次，有人言：佛、菩薩相不定，如此中說；隨眾生所好，可以引導其心者為現²¹⁸。

II、別論

(I) 三十二相之「金色相」(No.14)

又²¹⁹眾生不貴金而貴餘色——琉璃、頗梨、金剛等，如是世界人，佛則不現金色，觀其所好，則為現色。

(II) 三十二相之「手足指長勝於餘人」(No.3)、「手足縵網相」(No.6)

又眾生不貴纖長指及網縵——

以長指利爪²²⁰為羅剎相。

以網縵為水鳥相，造事不便，如著手衣，何用是為？如罽賓國彌帝[肆-聿+(入/米)]力²²¹利菩薩手網縵，其父惡以為怪，以刀割之，言：「我子何緣如鳥？」

(III) 三十二相之「肩圓好相」(No.21)

有人不好肩圓大，以為似腫²²²；

(IV) 八十隨好之「腹不現」(No.58)

有以腹不現，無腹如餓相；

參見《大智度論》卷 88〈78 四攝品〉：「佛既知眾生二種性已，知其果報，善道、惡道種種差別。惡性者墮三惡道；善性者有四種道：人、天、阿修羅、涅槃道。」(大正 25, 683c2-4)

²¹⁷ 《正觀》(6), p.212:《大智度論》卷 29 (大正 25, 274b26-c4)。

²¹⁸ 現+(相)【宋】【元】【明】。(大正 25, 684d, n.2)

²¹⁹ 又=入【明】。(大正 25, 684d, n.3)

²²⁰ 爪=抓【宋】【宮】，=瓜【明】，=拞【石】。(大正 25, 684d, n.4)

²²¹ 案：「彌帝[肆-聿+(入/米)]力利」，或作「彌帝隸尸利」。參見印順法師，《大智度論》(標點本)，p.3320 校勘：原「力」乃「尸」字之誤。

²²² 腫=腫【明】。(大正 25, 684d, n.5)

〔V〕三十二相之「眼色如金精」(No.29)

亦有人以青眼為不好，但好白黑分明。

Ⅲ、結義

是故佛隨眾生所好而為現相好²²³。如是等，無有常定。

〔c〕述餘義

有人言：此三十二相實定，以神通力變化身，隨眾生所好而為現相。

有人言：佛有時神通變化，有時隨世界處生，當生處不得言神通變化。

又於三千大千世界中隨可度眾生處生，則為現相。如《密²²⁴迹經》中說：「或現金色、或現銀色、或日月星宿色，或長、或短，隨可引導眾生則為現相。」²²⁵

隨此間閻浮提中天竺國人所好，則為現三十二相。

天竺國人于今故治肩膊²²⁶令厚大²²⁷、頭上皆以有髻²²⁸為好。

如人相中說五處長為好。眼、鼻、舌、臂、指、髀²²⁹、手、足相，若輪、若蓮華、若貝、若日月，是故佛⁽¹⁾手⁽²⁾足有千輻輪²³⁰、⁽³⁾纖長指²³¹、⁽⁴⁾鼻高好²³²、⁽⁵⁾舌廣長而薄²³³。如是等皆勝於(684b)先所貴者故，起恭敬心。

有國土佛為現千萬相，或無量阿僧祇相，或五、六、三、四相²³⁴。

隨天竺所好故，現三十二相、八十種隨形好²³⁵。

²²³ 〔好〕－【宋】【元】【明】【宮】【聖】【石】。(大正 25, 684d, n.7)

²²⁴ 密=蜜【宋】【元】【明】【宮】。(大正 25, 684d, n.9)

²²⁵ (1) 參見《大寶積經》卷 10〈3 密迹金剛力士會〉(大正 11, 53b24-c5)。

(2) 密迹經：現金色等光。(印順法師，《大智度論筆記》〔H016〕p.407)

²²⁶ (1) [骨*專]=膊【宋】【元】【明】【宮】。(大正 25, 684d, n.10)

(2) 案：《大正藏》原作「[骨*專]」，今改作「膊」。

²²⁷ 三十二相之「肩圓好」(No.21)。

²²⁸ (1) 三十二相之「頂髻肉成」(No.32)。

(2) 髻(ㄐㄟˋ)：1.在頭頂或腦後盤成各種形狀的髮髻。(《漢語大詞典》(十二)，p.739)

²²⁹ 髀(ㄅㄧˋ)：1.大腿骨。2.指股部，大腿。(《漢語大詞典》(十二)，p.408)

²³⁰ (1) 三十二相之「足下二輪相」(No.2)。

(2) 《大智度論》卷 4〈1 序品〉：「二者、足下二輪相：千輻輞轂，三事具足，自然成就，不待人工，諸天工師毘首羯磨，不能化作如是妙相。」(大正 25, 90a29-b2)

²³¹ 三十二相之「手足指長勝於餘人」(No.3)，八十隨好之「指長纖圓」(No.14)。

²³² 八十隨好之「鼻直高好」(No.2)。

²³³ 三十二相之「舌大、軟、薄，能覆面至耳髮際」(No.27)。

²³⁴ 〔相〕－【宋】【元】【明】【宮】。(大正 25, 684d, n.13)

²³⁵ 好+ (釋第七六品訖第七十七品上)【聖】。(大正 25, 684d, n.14)